



## TOMANATUGA FA'ALEAGAGA MO APERILA 2022

### “Ia Manuia Le Tupu O Lo’o Maliu mai:Tusi Faitau - (1 Tupu 1: 32—40; Lk. 19: 28—40)

I le suafa mamalu o Iesu le Ao ole Ekalesia, e fiasia fo'i e toe ofoalofa ma toe fa'atalofa atu ai i le paia ma le mamalu tele ole tatou Kapelenisia Samoa i totonu ole Puleaga Fa'a-Akiepikopo i le Lau-mua nei i Ueligitone. Faafeiloai atu fo'i i le au faitau o le tatou tautua le Taulogologo o lo'o tapuai mai i nisi tafā o Aotearoa nei aemaise tafā mamao ole lalolagi. Malo le soifua lelei ma le lagi matafi.

E ui lava ina fa'amalumalu mai pea aso ma taimi e lē taugamālie i le soifua ma lo tatou nei ola. Peita'i ua finagalo malie lava o ia, e fa'asaogalemuina mai lo outou soifua laulelei ma so matou ola vaivai i lenei Masina lona 4 o lenei foi tausaga Fou.

Ae alo maia, o se tomanatuga Fa'aleagaga fo'i lenei se'i folamua ai le tatou aga atu mo le Vaiaso Paia, aemaise le faigamalaga fa'aleagaga i le Eseta.

"Ua latou vivii atu i le Atua ma le leotele,ua faapea ane," Ia Manuia le tupu o lo'o maliu mai i le suafa ole Alii;" Osana i mea aupito i luga. (Lk 19:37-38)

O le va'ava'ai atu i le talafa'asolopito, ma le fetu'una'iga o Aso, ma mea na tutupu ai, ua tula'i mai ai se faitauga e fa'apea, ua fa'amatala mai nei e Luka, (Mataio ma Mareko) mea na tutupu i Ierusalem i le ulua'i Aso ole vaisapati, o lona lua lea o Aso ole Masina o Aperila, ile Tausaga e 30. Ua ou faia nei se to'esega fa'anatinati ma iloa ai, ole 1992 lenei o tausaga, talu lena aso tele fa'a le Atua, na mamalu ai lona suafa i loto o tagata, o e na fa'alogologo, o e sa va'ava'ai ia Iesu ma lana galuega, atoa ma ē sa fa'atalitali atu i le olataga mai le Atua.

O le Alii nei fo'i, e pei ona maitauina lona uiga to'amalie ma le lē fiailoa, peisea'i ua 'ese lava lea Aso, auā ua se'e ese o ia mai le "aia le fa'alauloaina" ma le "aia ne'i fa'alauteleina atu." A'o lea ua a'apa atu nei i faiga ma āga fa'a-Tupu a le lalolagi, ina ia Afio atu i Ierusalem, o ia ole Tupu, Ole Malō o le Lagi.

Aiseā lenei suiga tele?

E foliga mai o lona fa'amoemoe lea, ina ia fai lenā Aso ma aso tele, e lauiloa ai lona tau Tupu, e taulāgia ai fo'i lona tamalii, ma o le a peseina ai i laugutu o tagata lona fa'alupega, ma lona Pāpā, o ia ole alo o Tavita, Auā ua o'o i lea Aso, ona Afio mai lea, ole Tupu.

O lona Afio mai ua tautupu ai lenā Aso, aemaise ina ua ia a'apa

atu fa'a'ailoilo ole Tupu. E ui ile valo'aga a Sakalia le perofeta, a'o le āta o lo'o fafagu mai e Iesu i lena lava Aso, ole tala lea ile fa'au'uina o Solomona i Kiona, ina ua lamalama fa'ai'u le nofoa'iga a Tavita lona Tamā i le va o le TLM 1000-500. Ole tala faasolopito o lo'o tusia i le igoa o Tupu pei ona fa'amauiina ile tatou tusi Faitau 2 mai le Tusi 1 Tupu: 32-40) o atagia ai nisi o itū e matuā vāvālalata, ile Afio atu fa'atupu o Iesu i IERUSALEMA, e pei ona tusia e Luka i lana fo'i Tala.

Ole tala fo'i lenei ile fa'au'uina o Solomona, o lo'o fa'apea mai, o se tasi lea o aso, na aupito tele ai le alaga o le fiasia, ma le vāvāo o le olioli, ina o alagaina e Isaraelu le soloai ane ole atali'i o Tavita i le nofoali'i. Auā ole finagalo lea o le toe'ina, ina ia fa'au'uina lona atali'i i tafatafa ole vaipuna o Kiona, a'o le'i Afio i Ierusalem e nofo mai i le nofoali'i. I le ma le isi, na tu'u atu fo'i e Tavita lana fa'alata, ( po'o le miula) ina ia ti'eti'e ai Solomona.

O le fa'alata po'o le miula, e tupuna mai i le asini tane,ma le solo-fanua fafine. E lē faia e Isaraelu lea faiga ia latou atina'e manu, auā o lo'o vavāo e le tulafono. Peita'i, sa le'i sa ona fa'aulufale i Isaraelu ni fa'alata. I le ma le tasi, na o'o ina fa'ataunu'uina atili lea manu, ma avea ai o se tasi o measina ma mea tāua ma le silisili. Ua o'o lava fo'i ina onomea ona faitaulia, o se tasi o measi-na ma e onomea ona faimeaalofa ma aualofa atu ai i Tupu,ma alii mamalu. Sa i ai lava ia Tavita se fa'alata, lea na ia tatala atu e ti'eti'e ai Solomona,ina ia mamalu ai o ia.

O le fa'au'uina lenei o Solomona,e pei ona molimau i ai Tusitala o le tala i Tupu, fai mai e leai se isi Aso fa'apea i le Nu'u, auā na mavaevae le 'ele'ele ona o le latou 'alaga. Atonu ua na o se gagana fa'atusa lea upu e fa'asino i le leotele ma le tāfitifiti o lo latou olioli i lena aso, e fa'asoifua le tupu, ma fa'alagilagi le alo Tavita, auā le nofoali'i o Isaraelu.

A'o lenei la, i le Tausaga e 30 ma le Aso lona 2 ole Masina o Aperila, ua tatou fa'amanatu i lenei Aso, o lea ua a'apa atu Iesu i na aga ma faiga fa'atupu, e pei ona moemiti i ai, ma moe mo'o-mo'o i ai lutaia, i le faitau selau ma selau o Tausaga ua fano. Ai-loga na to'a tele ni isi pe afai na i ai.? Pe na latou manatuaina fo'i le fa'au'uina o Solomona? A'o le va'ava'ai atu fa'ale mafaufau, ina ua Afio mai o ia ole Tupu, e tusa ole Tala a Luka, o lona fa'au'uga fa'alalolagi lava lea ua vagavagaia nei, ma alalaga ai lutaia. "Osana i mea aupito i luga,".

Pe a ma ni Masina se sefulu ma le tasi, ma ni Tausaga se lua,ua

## “IA MANUIA LE TUPU O LO’O MALIU MAI:TUSI FAITAU - (1 TUPU 1: 32—40; LK. 19: 28—40)

tuana'i atu o le galuega a Iesu. Le galuega na ia savalia ai le Nu'u o tagata Ola, ina ia mafanafana le fa'anoanoa; ia laulelei le molemanava; ia fealofani le fefa'au'ua'i, ia to'amalie le atuatuva'e; ia malolō le ma'i; ma ia toe ola mai le oti. Le galuega lea o lo'o sili ona lauiloa ai o ia, ona o lona Alofa ma lona mutimutivale, e lē tufalaā'ia ai se tagata, e o'o lava i le tagata na lafoa'ina. Lea la, ina ua Afio a'e, ma ua alala mai le manū fa'atupu, ona osofia lea o e nai le ala i Ierusalemā i lena aso, ile alaga o le olioli, atoa ma le alaga o le fiaola. Auā ole uiga lea ole Upu Osana, ole Fiaola. Ua fa'amatala ina ia fa'apea. "Le Alii e, lavea'i mai." Ole ala fo'i lea ole aga'i atu ole Nu'u i Ierusalemā, ina ia fa'amanatu le paseka, le tausamiga e manatuaina ai le talileleia e le Atua ole Fiaola o latou tupu'aga, i le mea na latou nonofo pologa ai i Aikupito.

O lenei Aso ma le fa'amanatuina o ia mea, ua lagaina ai mo i tatou se fesili e fa'asaga, ma va'ai atu iā te ia, ma aloalo atu ia te ia, "Ua afio mai ole Tupu, ma o lo tatou Faaola lava ia. Ua ou faia sina faaliliuga ile matua ina ia faitauina e faapea." Fiaola, fiaola le Alii e, ma laveai mai nei, le Alo e, o Tavita. Fiaola, fiaola ia te oe lē ua sili i mea uma lava." Pe mata ole uiga lea sa tanumia i lalo ifo ole gagana Eleni, na tusia ai e Luka lana Tala, ma o lo'o fa'aogaina ai le Upu Osana. Le Agaga ole Fiaola, le

Agaga ole fa'amoemoe, le Agaga ole fia mapu, fia malolō, fia sa'oloto. Lenei ua masua, lenei ua lia'ina ma ua folasia i malae. O ai a toe gūgū o lea ua i o latou luma le Tupu, o lenei ua to'ai lē ua fa'au'uina (mesia) O ai a toe va'ai'ese ua pafale le fa'aolataga..

E lē pa'ela le faitau a le motu o tagata, i le uiga tau Tupu ole mea ua tula'i mai nei, ma lona latoileala, o lo'o ua alala mai i le manū fa'atupu. Peita'i, e i ai le tasi fa'aילוilo o lona tautupu ua fia fa'asaga nei i ai. Ta'oto ia lona mamalu e pei ona fa'alagilagi lona fa'alupega ole Alo o Tavita. A'o lena lava mamalu, o lo'o ta'aui ma afifi mai ai le fa'aילוilo ole lotomauualalo, le Filemu, le alofa ma le agalelei. Ua atagia mai fo'i i lea lava fa'aילוilo, ile faiga fa'atupu ua na a'apa atu nei i ai ma fa'atino. Le Tupu e mafai ona aumai lona laei e soloi ai le 'ele'ele ole tagata puapuagatia, pei ona fa'amatala le tagata Samaria Agalelei. (Lk 19:23ff) Le Tupu e mafai ona fa'a'ele'elea ona 'a'ao, e tagofia ai papala ole lepela ma le gasegase ole pipili. Le Tupu e lavatia e ona fofoga le gaganamasaō atoa ma le muimui a lona lava Nu'u. Le Tupu e le sunuia fa'apule malosi lona finagalo, a e fa'ao-looloma'au lana amiotonu, ma e lē lavea fo'i le lima o lona faamaoni. Le Tupu lea na Afio ane ile asini, a'o le asini ole fa'aילוilo ole lotomauualalo le Filemu ma le Alofa.

E fia laga nei se manatu, ina ia iloa, ole Tupu lea na auina mai e le Atua na te fa'aola ile lalolagi, e tusa i lona finagalo, lea ua atagia mai, e lē ma le muā'au o taua, a'o le tagāvai ole tu'uina atu ile fa'alōlō ma le fa'aolo, ina se'i faia i lona loto, le finagalo o lona Tamā.

Ole vala'au ua fia faia nei, ole tatalo lea ina ia fa'amaualalo ia o tatou loto, ma fa'aeaea atu ia o tatou ulu i lona mamalu i se Tatalo fa'apenei. "Fiaola, fiaola le Alii e, ma laveai mai le alo o Tavita e, fiaola ia te oe lē ua sili i mea uma lava.." Auā o lele ua Afio mai ole Tupu.

Ia Manuia tele le Aso Sa o Laupama, Manuia le Vaiaso Sa Sili, aemaise se Eseta Filemu i le tatou Kapelenisia Samoa.

Soifua ona o Keriso

Vauelei & Veronika Tolova'a

## AFIOGA KATINALE JOHN DEW

24 Mati 2022

Kia tau te rangimārie ki a koutou

O le aso To'ona'i 19 Mati na fa'amamaluina ai le Sulufaga Sagato Iosefo, ua aumai ai se Fa'avae Fa'aaposetolo a Pope Faranisisi ua ta'ua "Tala'i le Evagelia". O se tusitusiga ua tatala mai ai tofiga ta'ita'i a le Vatikano i so'o se tagata ua papatisoina, e a'afia ai ma tama'ita'i. Ua fa'atulaga mai e lenei tusi le fa'atulagaina ma matafaioi a le Kuria Roma ma aumai ai lana va'ai mamao mo le Ekalesia i Tulafono a le Kuria.

O le tusitusiga atoa e faigatā ona avatu i lenei tusi, ae o se manatu tāua, aemaise mo a'u, ma le fa'amoemoega mo tatou uma, o se mea ua ta'ua e Faranisisi i le tele o taimi, o se fa'afouga moni e fa'avae i ona fa'atumutumuga lava i se "fa'afouga mai totonu," o lona uiga o le liua

fa'aletagata. O le uiga lena o le Fagafulu, o se vaitau ua vala'auina ai i tatou i se pa'iaga sili, amio tonu, tu'ufa'atasia o tatou olaga ma le Evagelia. E vala'auina so'o i tatou i se liua mai totonu.

"Tala'i le Evagelia" sa fai mai le tele o tausaga, ma o lenei ua o'o mai se taimi tāua tele i le



Ekalesia, i lenei taimi a o tapena atu mo le Sinoti o le a ta'ita'ia i tatou e fa'alogole tasi i le isi ma avea o se Ekalesia e iloatino, se Ekalesia ua mafai ona iloaina galuega a le Agaga Pa'ia iā i tatou ma mulimuli i ana ta'ita'iga. O le galuega lea mo tatou, mo le i latou uma ua papatisoina.

O le vaiaso lava lea na fa'aילוa ai tusitusiga nei a le Pope, o faife'au uma a le lalolagi na taulimaina se tusi mai le Failautusi Aoao a le Sinoti a Epikopo fa'apea le

## AFIOGA KATINALE JOHN DEW

Ta'ita'i mo le Fa'apopotoga a Ositaulaga. O se tusi fa'amalosi'au, ua talosagaina ai i tatou ina ia a'afia i faigatalosaga a le Sinoti. A tatou manana'o i le Ekalesia ia ola, a tatou manana'o i le Ekalesia e aogā i o tatou olaga, a tatou manana'o i le Ekalesia ia ola i sosaiete ma fa'aosofiaina le sosaiete i a'oa'oga lelei a le Evagelia, ona tataua lea iā i tatou uma, ositaulaga ma tagata ona auai i le avea o se Ekalesia e iloatino, o se Ekalesia e mafai ona fa'aailoa le galuega a le Agaga Pa'ia i totonu o i tatou ma mulimulita'i ile ta'ita'iga a le Agaga Pa'ia.

Fa'amolemole sa'ili mo ni auala e fa'amalosi'au ai le tasi i le isi, tagata palisi ma ositaulaga ina ia auai fa'atasi ile faiga e iloatino ai le fa'agasologa a le Sinoti ua vala'auina ai tatou e galulue fa'atasi ai.

Nāku noa. Nā

+ Ioane

## O LE AUALA I EMAU: O SE FA'ATA'ITA'IGA O SUIGA FA'ATA'ITA'I

: A o tatou faimalaga atu i aso e Tolu o le Eseta, e mafai ona tatou va'ava'ai i tua atu o le fa'akoluseina aga'i i le fa'amoemoe ua fa'aosofi-asina e le Toetū. I lenei faiga o se tasi o tala matagofie mai evagelia – o ni tagata e to'alua na faimalaga fa'atasi ma Iesu i le ala aga'i atu i Emāu (Luka 24: 13 – 35). O lenei tusitusiga ua lauiloa ua fa'amatalaina se tala e pei o se solo, ua tumu i uiga ma ua aumaia ai se malamalama'aga fou i faitauga ta'itasi. Ioe, o le tala ua si'itia ai i le tele o fa'auigaga. Ae ui i lea, mo le mafua'aga o lenei tusitusiga o lona uiga mo tagatā lotu ma ta'ita'i o Ekalesia, e le na o tatou Katoliko, ona ua fa'aalia ai vaega autū mo le suia o ia ta'ita'iga.

Se'i o tatou fa'amanatu iā i tatou lava ni vaega e lē o fa'aleōa maia e le tala. I le mae'a ai o le fa'akoluseina, e to'alua ni so'o na tu'ua Ierusalem ma savavali atu i se nu'u ua ta'ua o Emāu pe fitu ni maila le mamao. O lo'o i ai ni fa'amatalaga i le tala lenei e lē o fa'amatalaina mai. Mo se fa'ata'ita'iga tatou te lē iloaina le mafua'aga o le la malaga. E o'o lava i le fa'aailoaina mai o Emāu e le'i fa'aailoaina mautinoa maia ma o se mataupu o lo'o tau matemate atu i ai. Ua ta'u maia o le tasi o i la'ua ua igoa ia Kaleopa ae e lē o ta'u maia le igoa o lana pa'aga. Sa i ai ni masalosologa i le igoa o le pa'aga a Kaleopa. O se tasi o tala, mo le fa'ata'ita'iga, o lana soa i lenei faigamalaga o lona to'alua.

O le tala ua amata i le fa'amatalaina mai iā i tatou o tagata e to'alua o lo'o faimalaga. A o

malaga atu sa feiloa'i i se tagata 'ese; na ta'u maia ia i tatou o Iesu, ae o nei so'o e le'i iloaina o ia ona sa fa'anoanoa tele ma mafatia. Ua tatou iloaina o le la mafatiaga ma le fa'anoanoaga na mafua ina ua fa'alogu i le tala i le fa'akoluseina ma le maliu o Iesu Keriso le fa'aola, sa tu'u uma i ai o latou fa'amoemoega. E tāua fo'i, e ala i tusitusiga ma fa'aaliga mata'utia, e ui o uiga atoatoa o upu ma gaioiga a so'o nei e to'alua e lē malamalama i ai i la'ua, e mafai ona malamalamaina manino e le au faitau.

O le tagata 'ese na savavali ma i la'ua na amata ona fa'alogologo lelei i popolega a nei tagata e to'alua a o aga'i atu i lo latou taunu'uga. O lo'o i ai se lesonea mo tatou ma ta'ita'i. E tāua, mo se fa'ata'ita'iga, ona fa'amamafa le tāua o le fa'alogu. E pei ona fai mai se tasi o fai filosofia a Eleni, 'na e fanau mai e lua ou taliga ma le gutu mo ni mafua'aga'. E lē mafai ona fa'asilia le tau o le manuia o le fa'alogu i manatu a isi ma le amana'ia o latou manatu.

Ae ui i lea, i le fa'alogu ai i o la fa'amatalaga, na a'oa'i e Iesu i la'ua. I le ave'eseina mai o la'ua i o la'ua lagona fa'anoanoa, sa ia agai atu ile fa'amatalaina o tala a Mose ma perofeta. Sa ia fa'amanatu atu fo'i ia i la'ua tala e uiga i lona olaga. I le talanoa atu i o la'ua fa'afitauli i lenei auala, ua ia ofoina atu ia i la'ua se isi fa'amatalaga i o la'ua mafatiaga. I le avatu o se isi malamalama'aga i o la'ua va'aiga i se auala fou, ua avatu e Iesu ia i la'ua se fa'avae mo le fa'amoemoe, mo se va'aiga ma ni avanoa mo le



## O LE AUALA I EMAU: O SE FA'ATA'ITA'IGA O SUIGA FA'ATA'ITA'I

lumana'i.

E masani e lē avatu sa'o e Iesu ni tali i lu'itau ae sa fa'aoga ni fa'ata'oto ma tala e fa'ailoa ma fa'amatala atu ai ona manatu ma avatu ai ni avanoa fou ma ni fa'amoemoega. I lenei faiga, fai mai se tasi o tusitala; *O tala e fa'aoga e tu'u fa'atasia ai fa'apotopotoga. O tala e fa'asalalau mai i lea tagata i lea tagata...o tala maoa'e e mafai ona fa'amatala ma toe fa'amatala. I le fa'amatalaina o tala i lona lava soifuaga, na tosigā mai e Iesu le au faimalaga i lana fa'apotopotoga. E fa'apea fō'i le fa'ailoaina o se a'oa'oga e sau mai se tala ae mo fa'apotopotoga Kerisiano, o le tala fa'avae e uiga i le olaga, maliu ma le toetu o Iesu Keriso.*

O Evagelia ua a'afia ai le tele o fa'aoso a Iesu ua feiloa'i atu i isi tagata, pe o ni kulupu pe o ni tagata ta'ito'atasi. O le mea mata'iga o le avatu atoa o lana va'ai i tagata ta'ito'atasi. E ola e fa'avavevave e feiloa'i atu i nisi fuafuaga, ae ua fa'aavanoa lava le taimi e feiloa'i atu ai i se isi o lo'o mana'omia se fesoasoani. Fuafua lona faiga alofa o le fafine e ma'i i le puna toto na pa'i atu i lona ofu a o aga'i atu Iesu e fa'amalolo le afafine ma'i a Iairo (Mareko 5: 21 – 34). E i ai se lesona mo ta'ita'i e pisi ua manatu e masani ona fa'alavelave i ai ni mana'oga ma ni talosaga e le'i fuafuaina.

I le fa'ailoa atu o nei tala na vala'auina e Iesu le au faimalaga e va'ai i tua atu o latou matafaioi fa'aletagata ma talisapaia le laua'itele. Ua fa'amalosia Iesu ia i latou e fausia se āta atoatoa o latou tulaga.

Ina ua taunu'u i le fale talimalō na vala'aulia e tagata faimalaga le tagata 'ese e talisua ma i la'ua. O se taimi tāua lenei o le tala. Fai mai na 'fa'aauau Iesu e pei o alu i se mea e mamao'; ae o le mea moni sa mafai ona muta ai i le tala i le au faimalaga ua 'a'ai na o la'ua ae fa'aauau pea

le malaga a Iesu. Ae ua ta'u maia ia i tatou sa la tuanau malosī o ia e nonofo ma i la'ua. O le vala'aulia lenei a ia tagata i le tagata 'ese ua fa'ailoga ai le taimi tāua o le tala. Ua foliga mai o le taimi lenei o le so'otaga, o auala feso'ota'i, le vala'aulia a le au faimalaga i le tagata 'ese e auai ma i la'ua i se faiga'ai e tāua tele ona ua le o toe mafaufau ia i la'ua ma o la'ua fa'anoanoaga ma le fa'atafina'iaina i le amataga o le tala ua suia nei i se tasi ua va'ai i tua atu mo tagata fai malaga i le tala. O le taimi mulimuli ane na fa'afuase'ia ona fa'ailoa atu a o latou nonofo i lalo mo le mea'ai, ina ua tofitofi e le Ali'i le falaoa ma i la'ua e lē tupu pe ana lē faia le agalelei o le vala'auina mo se taumafataga.

O lenei ua fa'apupula e Iesu o la mata i se avanoa fou, se moni fou. E lē gata o se tali i ni mafua'aga ae o tali i ni lagona: *"E le'i mu 'ea o tā loto i totonu ia i ta'ua i le ala, ina ua fetalai o ia iā te i ta'ua i le ala, ina ua fa'amatala mai fō'i e ia o Tusi ia i ta'ua?"* Ua fa'amalosia ma sui ai la'ua i se fa'anaunauga fou. Ua mafai nei ona la o atu ma le loto tele ma le mafanafana ma fa'asoa atu le fe'au o lo'o fa'avae ai le tala. I le faia o le patipatia ma le fa'aevageliaina, ua ta'u mai e le evagelia ia i tatou na la toe fō'i i Ierusalem ma 'tau' atu i (isi) le mea na tupu i le ala, ma le maitauina o Iesu e i la'ua ina ua ia tofitofi le falaoa.

I le ala i Emau, na fa'ailoa e Iesu o ia o se ta'ita'i lelei. Ina ua fa'atasi atu se tagata 'ese i le la malaga sa la lē iloaina o ia, sa vala'auina o i la'ua e fa'asoa le la tala ma ia. Ona fa'amatala lea e lenei tagata 'ese o lana tala. I le tofitofiina o le falaoa, na iloaina ai e so'o nei o Iesu ua toetu mai – ma, i le malamlama'aga i lenei mea, na suia ai i la'ua.

## O LE PESE A LE 'AU'AUNA

UA MAUAINA E LEOLEO MAMOE LEOLEO MAMOE LELEI (LUKA 2: 8 – 20)

Ua iai fō'i i lenā nu'u o leoleo mamoe, o lo'o nonofo i fafo i le pō ma va'ava'ai a latou lafu. Ona fa'afuase'i lea ona tū mai o le agelu a Ieova i o latou luma, ua pupula fa'ata'ali'oli'o iā i latou le mamalu o Ieova ma ua latou matuā fefefe ai. A ua fai atu le agelu iā i latou: "Aua tou te fefefe.

Faauta! Ou te faailoa atu iā te outou le tala lelei e olioli ai tagata uma, auā ua fanau mai i le asō i le a'ai o Tavita, le Faaola, o Keriso le Alii. O le faailoga lenei mo outou: O le a outou maua le pepe o faapulupulu i 'ie ma o loo taoto i le mea e tuu ai mea'ai a manu." Ona faafuase'i lea ona faa-

## O LE PESE A LE 'AU'AUNA

UA MAUAINA E LEOLEO MAMOE LEOLEO MAMOE LELEI (LUKA 2: 8 – 20)

tasi ane i le agelu o le 'au e to'atele mai le lagi, ua latou vivii atu i le Atua e faapea: "Ta tuu atu le viiga i le Atua o i le lagi, ma le filemū le lalolagi i tagata ua ia finagalo malie i ai."

Ina ua toe fo'i agelu i le lagi, ona talatalanoa lea o leoleo mamoe e faapea: "Tatou o loa i Petelee-ma ma vā'ai i le mea ua tupu e tusa ai ma le mea ua faailoa mai e Ieova iā i tatou." Ua latou faa-natinati atu ma maua ai Maria ma Iosefa, faapea fo'i ma le pepe o loo taoto i le mea e tuu ai mea'ai a manu. Ina ua latou vā'ai i le pepe, ona latou faailoa atu lea o upu a le agelu e faatatau iā te ia. Ua ofo i latou uma ua faalogo i ai i mea ua ta'u atu e leoleo mamoe, a ua taofimau e Maria nei upu uma, ma ua manatunatu i ai i lona loto. Ona toe fo'i lea o leoleo mamoe, ua faamamalu ma vivii i le Atua ona o mea uma ua latou faalogo ma vā'ai i ai, e pei ona ta'uina mai iā i latou' (Luka 2: 8 -20).

O lo'o i ai se uiga loloto na ulua'i fa'aalia ai e le Atua Iesu, le Alo o Maria i leoleo mamoe e ala i le pese o le filemū fa'amesia. I lenei poto masania Maria, ua feso'otai ai ni folafolaga tetele e lua atonu sa ia tomanatu ai i tausaga e tele ma atonu ua fa'apena ona lagonaina i le loto o Iosefo: o le Atua lava ia o le Leoleo Mamoe, ma o ia o le filemu ma aumaia le taoaga o le filemu. Fa'atasi ai ma le asiasiga a leoleo mamoe, sa au ai fa'atasi atoatoa na avea ma ulua'i avefe'au o le sau o le Fa'aola, o perofetaga tele o le a toe fa'aleoina mai i le loto o Maria ma Iosefo:

"Fa'auta, e afio mai le Ali'i le Atua ma le malosi, e pule lona 'a'ao mo ia; fa'auta, ua ia te ia lana tau, ua i ona luma le totogi o lana galuega. Na te leoleoina lana lafu e pei o le leoleo mamoe; na te sapaia tama'i mamoe i ona lima, ma tauave i latou i lona fatafata; na te ta'ita'i filemu i mamoe ua fananau.' (Isaia 40: 10 – 11).

Auā ua fa'apea ona fetalai mai o le Ali'i le ATUA, Fa'auta, o a'u, o a'u lava, ou te su'eina la'u lafu, ou te matuā su'esu'e lava i ai. E pei o le leoleo mamoe ona su'eina o lana lafu i le aso o i ai o ia i lana lafu ua ta'ape'ape; e fa'apea ona ou su'eina la'u lafu ma ou laveaiina i latou ai mea uma ua salalau ai i latou i le aso fa'amalumalu ma le pogisa. Ou te aumai fo'i i latou nai nu'u, ma ou fa'apotopotoina i latou mai nu'u 'ese; ou te aumaia i latou mai nu'u 'ese'ese; ou te aumaia i latou i lo latou lava lau'ele'ele, ma fagaina i latou i mauga o Isaraelu, i tafatafa o vaitafe, ma mea uma e tina o le nu'u. Ou te fafaga ia te i latou i le taaga lelei, e i ai o latou lotoā i mauga mauaululuga o Isaraelu; latou te ta'o'oto ai i le

lotoā lelei, ole taaga lelei fo'i e 'a'ai ai i latou i mauga o Isaraelu. Ou te fagaina la'u lafu, o a'u fo'i e ta'o'oto ai i latou, o lo'o fetalai mai ai le Ali'i le Atua. Ou te sa'ilia fo'i le ua sē, ou te aumaia le ua tulia, ou te fusia le ua gau, ou te fa'amalosia le ua vaivai; a o le ua peti ma le ua malosi ou te fa'aumatia, ou te fagaina i latou i le fa'amasinoga. (Esekielu 34: 11 – 16).

O Maria ma Iosefo na maitauina ia Iesu, le Atua ma i tatou, le Leoleo Mamoe Lelei na folafolaina ua tu'uina mai ia i tatou le alofa e lē uma a le Atua, lo tatou Tamā, e alofa mo ona tagata. Sa latou olioli i leoleo mamoe fa'atauva'a sa fa'aioaina Iesu i so'o se mea na latou o i ai. O Maria ma Iosefo na maitauina ma agelu, ona ua latou iloaina o Iesu o le Perenise o le Filemu.

E sili atu i lo se isi lava, na iloaina e Maria o Iesu e le'i sau e fa'amasino pe tu'ua'ia ae ia sa'ili le mamoe ua leiloa ma fa'aleleia i latou. Tatou te mana'omiaina le mafaufau a Maria ma le leoleo mamoe lelei ina ia mauaina Iesu, olioli ma agelu, ma pese i ona vi'iga ma folafola lona filemu. Ua teuina e Maria i lona loto le fe'au na aumai e leoleo mamoe lelei ma agelu. Ma o lana metitasio ia Iesu le Perenise o le Filemu, ia Iasu le Leoleo Mamoe Lelei, ua i ai se tatalo mo tatou, o le Ekalesia ia lava pea 'leoleo mamoe lelei', leoleo mamoe ua fa'atonutonuina i le fa'atusa o Keriso ma fa'asoa atu i tagata uma. A tatou patipatia nei mea tetele i le Eukalisitia, tatou te mana'omiaina le manatu fa'afetai a Maria. E ao ona tatou fa'afetai mo le fe'au ua aumai iā i tatou ina ia tatou tatala atu o tatou tagata atoatoa i le kalasia ma fiafia i le tala lelei.

O se va'aiga ia Sagato Luka, le faia'oga sili o tatalo, e fa'amuta lana fa'amatalaga o mea tetele uma na tutupu i le fanau mai o Keriso i se pese o le vivi'i. I so'o se mea lava ua folafolaina e leoleo mamoe lelei le tala lelei o le Atua ma vivi'i i le Atua. O Maria o le fa'ata'ita'iga o le pese o vi'iga; o se fa'aalolao moni o Maria o le ta'ita'iina ai i tatou e malamlama i le Eukalisitia atoatoa. O le a suia ai o tatou olaga uma i le Pese a Maria, o se viv'iga o le Atua mo leoleo mamoe lelei.

Matou te fa'afetai atu ia te oe, le Silisili'ese ma le Atua pa'ia e;

Ona ia Iesu Keriso, ua e fa'ataunu'uina ai au folafolaga o'oe lava

o le a avea ma Leoleo Mamoe mo ou tagata.

## O LE PESE A LE 'AU'AUNA

UA MAUAINA E LEOLEO MAMOE LEOLEO MAMOE LELEI (LUKA 2: 8 – 20)

Fa'apa'ia i matou, faia ia tasi i matou i lou alofa  
ina ia matou iloaina lelei ai Iesu;  
le Leoleo Mamoe lelei ma fa'atasi pea ma  
ia Fa'amanuia lau Ekalesia, ina ia maua pea ni  
leoleo mamoe lelei.  
Ua iloaina ona vivi'i oe ma aumai le fe'au o le  
filemu i tagata uma.  
Fa'atupu ia i matou se alofa mo latou ua leiloa  
ina ia pei o Maria ma Iosefo,  
iloaina oe o le Leoleo Mamoe Lelei  
Ma ia fa'ailoa atu oe i tagata uma e loto  
lelei. Maria e,  
le Tinā o le Leoleo Mamoe Lelei,  
tatalo mo matou ma tatalo mo leoleo mamoe a le

Ekalesia  
Ina ia latou iloaina atoatoa le igoa o Iesu, le  
Leoleo Mamoe Lelei  
Ina ia fa'atumulua o latou loto i le agalelei mo  
latou ua sē 'ese,  
ina ia sa'ili ma le onosa'i i latou ma toe  
fa'aulufale mālie mai i fale o le Tamā.  
Tatalo mo matou ina ia avea le agaga fa'afetai e  
fa'aosofiai ai i matou i mea uma ua matou  
mafaufau i ai, fa'anaunau, ma faia. Ame-  
ne..fa'aauau pea....

TOE FA'AFUGA MAMANA - I TUA ATU O PALISI (FA'AAUUAU MAI LOMIGA TALU AI)

## O LE VA'AIA TINO I LE FA'AITIITIA

6

Pe ua tatou fa'alogu i le fa'aupuga "Ia e ola ai i  
taimi manaia". E talitonuina o se alagaupu  
fa'aapolokalifa anamua a Saina na talitonuina o  
se fa'amalaiaina. Aiseā o se fa'amalaia? Ona o le  
ola ai i taimi manaia e masani o lona uiga i taimi  
o suiga – ma o suiga ua aumai ai ma le lē mau-  
tonu, popolega, fa'alavelave ma le ave'eseina atu  
ai o mea masani.

E pei ona tatou fa'ailoaina mai fa'amaumauga  
fa'asosaiete, ma e to'atele nisi o tatou sa moli-  
mauina i o tatou palisi, o le Ekalesia o le seneturi  
luasefulu tasi o lo'o ola ai i taimi manaia. Ua  
tatou va'aia le fa'aitiitia, e lē gata i fuanumera ae  
o le ola fa'amisionare. Mo latou o lo'o taulamua i  
le faia o auaunaga masani, ua manino mai o faiga  
masani ua le toe aogā. O lo'o tatou tauivi nei, ma  
i le ogatotonu o lona tauiviga, ua faigofie ai ona  
iloaina le mamafa ole avega o le to'ilalo ma le  
leai o se fetu'utu'una'i o le avega o le māasiasi.

O le mea moni lava, e ui i lea, o a tatou fa'afitauli  
e maotua atu i o tatou palisi, o tatou pule'aga, ma  
o tatou nofoaga i lenei lalolagi. O le fesuia'iga o  
le aganu'u fa'alalolagi nei o lo'o tupu i se  
saosaoa e le'i iloaina muamua. I sana tautalaga i  
se fonotaga a le Ekalesia a Italia i le 2015, sa  
fa'ailoa ai e Pope Faranisisi e fa'apea: *tatou te lē  
o i ai i se vaitau o suiga, ae o suiga o le vaitau.*”  
O papatusi o le tala'aga ua na gaioti talu mai le  
onosefulu tausaga talu ai, ma e talitonuina o nisi  
nei o fesuia'iga tāua tele i le sefululima o se-

neturi. Ua fa'amanuiaina i tatou ona ua maua  
tonu ai i tatou i le ogatotonu o nei gaioiga. O le  
mea e tatau ona tatou faia o le fuafua po'o a mea  
e faia ma le taimi ua tu'uina mai ia i tatou.

Sa i ai se taimi i le tala fa'asolopito, mai le  
fa'ai'ui'u o le seneturi fa'aga'i atu i le 1960, ina  
ua ō gatasi le aganu'u ta'uta'ua ma le aganu'u a  
le Ekalesia. O lenei, o se fa'aupuga fa'alaua'itele  
ae o se mea moni. A o gatasi ma aganu'u o lenā  
vaitau umi e i'u ifo ua e mamao ma le Ekalesia. O  
se suiga tele lenei, o se motusia ua vanimonimo  
lona lautele a lo tatou tala'aga.

Ua tatou fa'aogaina le tele o ni fa'aupuga manaia  
e talanoa ai e uiga i le vaitau fou ua tatou ola ai  
nei – le ma'ea-o le - Fa'akerisiano, le uma o aso  
nei, le mae'a- o malō- Kerisiano. O le a lava le  
igoa ua fa'aoga, ua tatou ola i taimi ina ua o ga-  
tasi le aganu'u ta'uta'ua ma le muta o le aganu'u  
a le Ekalesia, ma o le saosaoa o suiga ua fa'auau  
pea.

E fa'aapefa ona tatou va'aia la tatou moni e ala i  
mata o le fa'amoemoe?

## E Ono La'asaga a se Ekalesia ua Fa'asolosolo ona Mou Malie Atu

Ua tatou va'ai i ai i taimi ua tuana'i, a o maopopo  
se fa'apotopotoga, olaola ma tu lelei, e aga'i  
ta'ita'i mai le fa'afaileleina po'o se manatu  
fa'amisiona aga'i atu i se manatu o le tausiga  
po'o se manatu fa'afale mata'aga. O nei manatu

## O LE VA'AIA TINO I LE FA'AITIITIA

fa'atausiga ua fa'avasegaina, fa'atulaga ma tausia nei vaega. I Amerika i Matū, mo se fa'ata'ita'iga, a o tuputupu a'e palisi na fa'avaeina e tagata fai malaga atu, ma a o tu'u fa'atasia Katoliko ma aganu'u o le si'osi'omaga, o ta'ita'i na ulua'i nofoia ua avea ma atamamai i le tausiga. O tausiga na aga'i atu i le tausiga o tagata mama'i, ae ui i lea, ma maua ai ta'ita'i na gaiioi i faiga e pei o fale o tataga matutua, va'aiga o palisi ma pule'aga ua amata ona moumou malie atu. O mea tonu na o lo'o tutupu i aso nei i tulaga tau ta'ita'i.

O se mea faigata o le fuafuaina lea o a tatou palisi i lenei va'aiga – o ni fa'apotopotoga o le fa'atuatua ua moumou malie atu. Ae e pei o le a tatou va'aia, o le lē pupula sa'o atu i foliga o le mea moni o le a televave ai lenei faiga. Se tasi o ta'ita'i a le Ekalesia Porotesano sa tusia se tusitusiga i vaega e ono o se ekalesia ua mou mālie atu. O lona anoa, e ui na tusia i se va'aiga Fa'aporotesano Fa'aevagelia, e tele ni vaega ua a'oa'oina ai i tatou e uiga i o tatou tulaga i le taimi nei.

**Fa'afitia**

O le la'asaga muamua na fa'aילוaina mai o le muta'aga o se fa'apotopotoga ole fa'atuatua o le *fa'afitia*. I lenei vaega amata, atonu o le lagonaina e se palisi ni fa'aitiitia se tele, ae foliga mai e leai se isi e popole tele i ai. O fa'amaumauga o numera ua va'aia ai le fa'aauiaina o faiga mai tausaga e tele ua tuana'i. Ole fa'aitiitia ua tatou i ai nei e le o se mea fou, ae i le sefulu o tausaga talu ai e leai se isi na va'aia pe popole i ai ona tatou te le'i lagonaina.

I le tele o atunu'u i le luaefulu tausaga ua te'a ua amata ona fa'aitiitia tagata i falesā. Ae i ai fo'i lava atunu'u e ui ua fa'aitiitia tagata i lotu ae o lo'o va'aia lava le anoanoa'i o tagata i Misasa. I tulaga fa'apenei, o palisi ma pule'aga ua tele ile mata'itu ia i latou lava, ua gaiioi e pei o ni kalapu na pau le mafua'aga na alai ona ola o le fa'amalieina lea o mana'oga a ona suli. O le tulaga lenei a se palisi o lo'o tausia, o lana mafafoi muamua o le fa'amalieina o mana'oga a tagata o le palisi ae le o le fa'aolataga ma le suiga o le lalolagi i tua atu o palisi. E tuliloa lava i tatou e le fesili o lo'o fai so'o nei: afai e tapunia taeao lau palisi e i ai ni popolega o latou e lē o ni suli o le palisi? E lagonaina le 'ese'esega? Po'o ua va'ai lau palisi ua na o ia lava ma le fa'atauva'a o le a'afia ai le fa'apotopotoga? O le fa'anoanoaga tele le anoanoa'i o falesā Katoliko i le

lalolagi i Sasa'e ua lagonaina le fa'aitiitia, ma o le tali mai ta'ita'i o Ekalesia o le tineia lea.

**Toe Fa'avasegaina**

O le vaega lona lua ua tu'uina mai o le *toe fa'avasegaina*. I lenei vaega, o se fa'apotopotoga ua ioeina o lo'o i ai se fa'aletonu ma taumafai e fo'ia le fa'afitauli i se taumafaiga e fa'atasi pe fa'alua, ma e leai o nei taumafaiga ua ofoina maia se malamalama'aga mo fuafuaga mo nei suiga.

O le faiga muamua o le toe fo'i 'ese mai lea i le faiga e le mautonu. I lo le asia o ni faiga fou, o ta'ita'i o palisi o le a fa'aauiaina ona faia pea mea na sau ai ma fa'aalu ai tupe e tele, taimi o tagata ma isi puna'oa. O le manatu fa'asolo e fa'apea: "Manatua mea sa tatou faia e le'i aogā? O le a tatou toe faia pea, ae o le taimi nei, o le taumafai atili!"

O le faiga lona lua e faia e ta'ita'i o palisi o le faia o se faiga tuai i se auala fou. I lo le suia faiga fa'avae, ua latou faia ni suiga laiti e toe fa'asa'osa'o ai le fa'avae o lo'o i ai, ae leai lava ni suiga tetele. O lenei faiga ua fa'anaunau mo le pulu siliva – le polokalame e tasi po'o se mea na tupu e lavea'ina mai ai le palisi po'o le pule'aga.

O palisi ma pule'aga i le taimi lenei o le faia lea o ni fa'amatalaga, aumai se tasi ua lauiloa, po'o le sa'ilia o se poloakalame aogā, e pei o le Alpha, ma ona fa'atali lea se'i fua mai. O le fa'afitauli e leai se mea mautinoa. E le mafai ona tatou faia ni fa'amatalaga pe fa'aali ni āta ona mālolo lea ma o mea uma o le a mautū. O polokalame, semina, latou e faia tautalaga, ma mea e tutupu e tataua ona tafe mai i se va'aiga mamao manino, se masani e alulelei ai faiga masani, ma se ta'ita'iga ua taumaua i ni suiga loloto. O mataupu ua feagai ma i tatou o faiga ua masani mai ai i taimi ua tuana'i, ma e mana'omia se tali fa'apea.

O tali uma nei e lua o le a toe fa'avasegaina e tutusa ona e lē o fusia i lalo e se fa'anaunauga mo ni suiga. O le manatu ua fa'apea o le fa'apotopotoga e mana'omia na o se fetu'una'iga. Ua tatou feagai ma lenei uiga mai ta'ita'i o palisi, ae ua tatou mauaina e sili atu i tulaga o pule'aga. O Epikopo ma a latou tagata faigaluega e le faia mai manino iā i tatou, ae ua latou feso'ota'i mai fa'apea: Sau ma galulu fa'atasi ma matou ositaulaga ma fai ia i latou e faia ni mea e 'ese; ma ta'u atu iā i latou e sui.



Matou te lē suia. E lē suia le faiaga o a matou ta'itia'iga po'o le ituaiga o ta'ita'iga pe taumafai e suia a matou faiga ua masani ai. Leai, leai lava.

O le sa'ilia o se loto mo suiga loloto, i le tete'e atu i ni suiga vave o se mataupu tele lea i le Ekalesia i aso nei. E masani ona tatou mafauafau i le tele o talanoaga i tausaga ua mavae e uiga i le fa'aevageliaina, ae o mea ua tatou maua i le tele o palisi e lē fou pe fa'aevageliaina fo'i. E masani o se faiga kapite tuai ua le manino fa'aupuga toe 'u'umi. O se tali lenei fa'atagata: fa'aaauu pea ona faia mea ua tatou masani ai. O se fa'auigaga fo'i ta'uta'ua o le tagata ua lē lelei le mafauafau.: o le fa'aaauu pea ona faia o le mea lava e tasi ae mo'omo'o mo ni i'uga 'ese'ese, e pei o la tatou mana'ona'o o le a suia ai. O le to'atele o a tatou ta'ita'i e fa'amaoni ma amio tonu, ae e le afaina pe tele sou matagofie pe tatalo so'o fo'i. Ua taunu'u mai le taimi e sa'ili ai le loto tele e sa'iili'ili ma mulimulita'i i suiga fa'avae ua avea ma tulaga faigatā.

### To'asā

O le isi la'asaga o le to'asā po'o le ita. E o'o i ai palisi i le tulaga lenei pe a amata ona iloaia o le fa'aaluaia i lalo i le manatu ua lē o alualu lelei, po'o ua latou iloaia o le pulu maneta e lē i ai se maneta. O le fa'afitauli i le tulaga lenei o ta'ita'i o palisi e lē manana'o e tu'ua'ia i latou i le leai o ni fua. Ua feitai ma filifilia e tu'ua'ia i si tagata.

O tagata palisi ua tu'ua'iale faife'au, ae masani o le faife'au ua tu'ua'ia le epikopo, ma ua na ole Ali'i e silafiaia o ai ua tu'ua'ia e le epikopo. E faitai tagata i tupulaga e lē o mai i le lotu. O isi ua tusi le lima ia i latou ua lē toe o mai i le lotu, ma latou ua o mai ma avea a latou nofoaga pe fa'alua i le tausaga, le Kilisimasi ma le Eseta. Ana fa'apea e o mai so'o, o le mafauafau ua fa'apea, o tatou fa'afitauli uma o le a fa'aleleia. O nisi e tu'ua'ia tu ma āga – taimi mulimuli mai o a'oa'oga o le atamai, moni ma le manatu i le amio tonu i o latou va feagai ai ma faiga masani i sosaiete ma mea ua masani ai e lē moni atoatoa.

I nei mea uma e mafai ona avea ma sini o le ita; ae tasi le mea ua tutusa ai o le mata'itū lea o le tu'ua'iga i isi. O ta'ita'i ua maua i le ita e tu'ua'ia isi tagata ma e masani ona fa'apea o ia ua a'afia. E musu e talia le matafaioi. I lo le taumafai e mafanafana iā i tatou lava i le tu'ua'i o isi malosi'aga, tagata, a'afiaga po'o ni taupulepulega leaga, e ao ona tatou fesiligia tatou lava po'o a

mea ua tatou faia ina ia ola ai o ni tagata fa'ami-sionare, feiloa'i ma feso'ota'i atu ma le lalolagi.

E o'o lava i le tu'ua'ia o tatou lava, e ui ilea, e tatau ona tatou fa'aeteete. E mautinoa lava e i ai lava o tatou fa'aletonu o se Ekelsia mole lē faia e pei ona fai mai ai le Tusi Pa'ia ma le Vatikano II – e maitau fa'aailoga o taimi ma tali sa'o atu i ai. Ua tatou misi nei avanoa lelei. Ae o le mea moni lava, e fa'apefea ona tatou iloaia le maoa'e o suiga ua tatou iloaia nei?

### Alu'ese Atu

O le vaega lona fa o le Alu'ese atu. I le tele o tausaga a o fa'asolosolo ona fa'aletonu, na fa'ateleina le mou atu. E o'o lava iā latou e lē o 'ese atu ua tau le 'au ai i Misasa. E masani a o tatou laiti e tumu saesae falesae ae o le taimi nei o falesae ua na o se vaega o lo'o 'au ai pea i sauniga. E o'o lava i Misasa i aso Sa ua tau fa'avaivai ai le agaga i isi taimi ona o le tele o palisi e tutusa taimi o a latou Misasa a o faitau afe tagata sa auai, e ui ua na o le 250 tagata ua va'aia i le fa'ai'uga o le vaiaso. Aiseā e faia ai e Katoliko nei faiga? E masani ona e fa'atāua e tatou le faigofie ma le mautū, o le mea lea tatou te lē tausia ai taimi o Misasa. O lenei ua na o le onosefulu tagata i se falesae e mafai ona ofi ai le ono salau ua nonofo mamao ai tagata mai isi. Ua moni lava ua fa'aitiitia a tatou palisi. E tāua le fa'aioaia le ita ua tatou lagonaina e uiga i lenei mea, ona o lenei ita e mafai ona ta'ita'ia i se isi mea – e maua ai le fa'avaivai, ma o le fa'avaivai e selesese mālīe i le fa'avae o le fa'amoemoe.

### Fa'anoanoaga

O le vaega lona ono o le mou malie atu o le fa'anoanoa. I taimi fa'apenei o le mou malie atu, o suli o fa'apotopotoga o lo'o totoe o le a tatala atu ai i le avanoa mo suiga – ona ua leai lava se isi mea o totoe. E pei ona fai mai se tasi: o le Ekalesia e pei o se vaisū. Fa'atoa tatala atu i suiga pe a lagonaina o le tigā o le tumau i faiga tuai ua sili atu i lo le tigā o ni suiga. I se va'ai mai fafo atu, o lenei fa'anoanaga e le foliga e leaga, ona o le a fa'amalosia ai ta'ita'i e tatala atu i ni suiga. I le tulaga lenei o le fa'anoanoaga, e ui i lea, o le tatala atu i suiga e le o se talitonuga maumaututū ae o le fa'asaoia o le tagata lava ia.

A tatou le fa'aeteete, o lenei manatu o le fa'asaoia o 'oe lava e mafai ona avea ma fa'aletonu. O se fa'apotopotoga ua moumou malie atu ae le o maitauina lea tulaga (po'o le lē popole fo'i), se



## O LE VA'AIA TINO I LE FA'AITIITIA

fa'apotopotoga e āno i le va'ai i tua atu, mata'itu i le tala'iga ae ua fa'aalu le malosī atoa ma tamāoaiga mo lelei o tagata o lo'o totoe, ua fa'afuase'ia ona iloina e mana'omia isi tagata – e le mo le fa'asoa atu ma i latou ae ona ua mana'omia ni suiga fou ina ia ola.

E masani o uiga o ta'ita'i a le Ekalesia i taimi lenei fa'apea e tataua ona tatou aumaia i o tatou palisi ina ia umi ai le ola. E lelei lea. O le fa'aosofiaga muamua e uiga i mea tatou te manana'o *mai* tagata i lo mea tatou te manana'o ai *mo* latou. Fa'anoanoaga o se taimi tāua mo se ekalesia ua mōumou mālīe atu. Ioe, o le Ekalesia e le fa'a'atu na o palisi ma pule'aga. O lo'o i ai fo'i i le Ekalesia ituaiga 'ese'ese, falema'i, a'oga ma univesete mo se fa'ata'ita'iga. Ae o va'ai i mea itiiti ma faiga fa'apule'aga o faiga nei ua fausia ai le fatu o le Ekalesia ma o lenei faiga ua alualu ifo lona fa'aitiitia mo sina taimi.

I nei taimi o popolega, o lo'o i ai se fa'amalama mo avanoa. Atonu o lenei taimi o le fa'anoanoaga e mafai ona ta'ita'ia i tatou i o tatou

tulivae ina ia mafai ai ona tatou 'ai'oi atu i le Ali'i e suia o tatou loto ma fa'afou le Ekalesia. O lenei liliuga o le a mafai ai ona tatou gaii atu mai le fa'anoanoa i se taumauga malosī ia suia, e le ona tatou te mana'o ia ola ae ona tatou te fa'anaunau ia fua mai fua a le Atua i lenei lalolagi. Tatou te o 'ese mai i le fa'atatau, tagata olaola ma fa'atinoga ae fa'amaopo mai se loto tala'i, fa'asoa le alofa a le Tamā ia Iesu Keriso ma isi.

### Tapunia

I lenei vaega, o a tatou palisi po'o pule'aga ua avea fuanimura fa'anoanoa – fa'anoanoa ona tapunia e le'i tataua ona tupu. E le mafai ona tatou fa'apea a'e o le finagalo lea o le Atua mo so'o se palisi ia tapunia. O nisi o taimi ole tapunia o se palisi ua tataua i se va'aiga lautele a le pule'aga i se fa'afouga. E le va'aia o se manumalō, po'o le a lava ni mafua'aga. O na tapunia e itiiti lava se a'afiaga a le Ali'i ae o mea uma pe fa'apefea i tagata ona ola ai o se palisi...*fa'auaau pea...*

## O LE EUKALISITIA, LE KERISO, MA LE VALA'AUINA IA FA'ASO'OINA

O le galuega tala'i a Iesu o le a mana'omia ai le te'ena ma le puapugatia i luga o le koluse, ona o la tatou Mesia e lē o le Mesia paoā i le manatu fa'alalolagi nei ae o se 'au'auna fa'akoluseina o lē na sasa'a mai o ia lava mo isi.

O le Fonotaga Fa'aeukalisitia lona 52 a Atunu'u Aufa'atasi na faia i Budapest (Hungary) ia Tese-ma 27, 2021 e le'i fa'amutaina i se fa'amanatuga maoa'e ae ua na o se tama'i pa'ō.

O le lauga a Pope Faranisisi na faia i le Misasa e tapunia ai lenei fa'atasiga, fa'anaunau mo se fa'aosofiaga ma se fa'amalosī'au i le fa'afouga i le mae'a o le fa'ama'i, le Eukalisitia le sauniga tāua mo lo tatou fa'asinomaga ma le saogalemū. Ae ui i lea, sa mata'itū le Pope i le Evagelia ma le fesili a Iesu i ona so'o "A o outou na, se a la outou upu ia te a'u nei, po o ai?" (Mareko 8: 29).

Sa fa'apea e talanoa sa'o mai Faranisisi i le to'atele ua leiloa atu mai le fa'atinoina o la latou fa'atuatua i luma atu ma le vaitau o le fa'ama'i, le tapula'a o Misasa i luga o tafa'ilagi, po'o le mafua'aga o le fevaevaea'i i le Ekalesia ua faia le Eukalisitia o se fa'aailoga o le fevaevaea'i.

### "O Le Atua o le falaoa na tofitofiina, e pei o le alofa na fa'akoluseina ma fa'ae'eina"

O Faranisisi o le e lē 'alo 'ese mai mataupu faigatā. Sa ia tolaulauina ma le loto tele "fa'aosoosoga a le Ekalesia" ma na ia fa'aalia foi "fa'ama'i o ta'ita'iga" i sana lauga i le Kuria a Roma.

Ua popole ua avea le Eukalisitia ma fa'aailoga o se fevaevaea'i loloto, sa ia tusi ma le loto tele i lana Tusi Fa'aaposetolo ia Iulai 2021 Traditions Custodes fa'aailoa ai "se fa'ai'uga maumaututū ina ia soloia uma mea masani na muamua mai i lea tusitusiga."

I lenei avanoa lē mafa'atusalia a se Fonotaga Fa'aeukalisitia Fa'avā o Atunu'u, sa fa'aalia se matamuli e lē masani ma le 'alo 'ese. Ina ua toe faitau ma faitau lana lauga i se manatu tatalo ma taumafai e fa'alogolele i ana upu.

"O le Eukalisitia ua i'inei e fa'amanatu mai ai iā i tatou o ai le Atua. E le faia na o upu, ae i se auala maumaututū, fa'aailoa mai iā i tatou le Atua o se falaoa ua tofitofiina, e pei o le alofa na fa'akoluseina ma fa'ae'eina," sa ia fai mai ai i se

## O LE EUKALISITIA, LE KERISO, MA LE VALA'AUINA IA FA'ASO'OINA

tasi o taimi.

Ua tatou iloaina ai fo'i ni fa'aaliga 'ese'ese i nei upu ma lona fa'aioaina mai o sitepu e tolu ua fa'amatala ai i tatou o ni so'o – folafolaina o Iesu, iloatino ma Iesu, ma le mulimuli ia Iesu – ma na talanoa Pope Faranisisi i nei mataupu.

Sa ia manino lelei ona fa'amatala le feso'ota'iga e le mafai ona mavaevae i le va o la tatou tali “O ai Iesu?” ma le uiga tāua o le Eukalisitia.

### O le fa'afouga o le sauniga a le Vatikano II e le'i mae'a ona fai

E tele ni tomanatuga talu ai nei i le Eukalisitia. O vaega mo lenei tomanatuga e lē o se va'aiga fa'aa'oa'oga ae o se faiga masani na ola ai i le KOVITI – 19 ma le susu'eina o le ufiufi o mataupu ua leva ma loloto o le fa'afouga o le sauniga na vala'auina e le Fonotaga a le Vatikano II (1962 – 65).

A o tatou i ai lenei vaitau o le fa'ama'i, le tapunia o falesa ma le leai o ni lagolagosua fa'aleagaga ua mafua ai nei fa'aletonu e le'i i ai muamua.

O Misasa i luga o tafa'ilagi ua lavea'iina ai le to'atele ona ua maua ai le feso'ota'iga ma lenei sauniga tāua. O isi ua iloaina le sauniga o se liu tino tagata, fa'aletino, feso'ota'iga fa'atasi, ua lagonaina le leai o se fepa'ia'i ma le feiloa'iga mafana i le lalolagi o tafa'ilagi ma le leai o se alu atu i tua atu mai le Eukalisitia e 'au'auna atu i le au matitiva ma latou i le taufa'as'iusi'u o le so-saiete.

O le mou atu o lenei “gaogaosā” o le a i'u ai i le “fa'alavelave i le feso'ota'iga moni fa'aletagata (fa'aaliga fa'aaposetolo i le mae'a o le sinoti, *Christus vivit* 88, 2019).

O le Fa'avae a le Vatikano II i le Sauniga Pa'ia, *Sacrosanctum Concilium*, ua fa'amatalaina se va'aiga mamao o le fa'afouga o le sauniga o se 'au ai fa'atasi atoatoa i le auaunaga o le tasi i le isi ma le “ta'ita'i o le sauniga.” O Eukalisitia i luga o laina o tafa'ilagi na fa'aalia ai fo'i le Ekalesia e fa'aautū i ositaulaga ma toe fa'afoia i tatou i vaitau i luma atu o le Vatikano II o ni 'au maimoa i faiga fa'alelotu.

O fevaevaea'iga i talitonuga e lē mafai ona fa'aleleia ma fa'amasinoga sauā e uiga pe fa'apefea ona avea ma so'o a Iesu ma pe fa'apefea ona

avea ma Ekalesia, ua malepelepe ai le Tino o Keriso ma fa'alavelave ai i fa'aleleiga.

### O mea'ai faifa'atasi ma le fafagaina o isi

O le Eukalisitia o la tatou tali atu lea i le poloa'iga a Iesu, “tou te faia le mea nei e fai ma fa'amanatuga ia te a'u” (Luka 22: 19). O fa'afouga ua poloa'ia ai i tatou e va'ai iā Iesu mo le tāua o le 'ai ma le fafagaina o isi i mea'ai fai fa'atasi ma uō, ma motu o tagata fia 'a'ai ma latou ua leai ni āiga.

O le telosia a le Vatikano II na toe fa'afo'ia le Misasa i se faiga'ai ma uō ua potopoto fa'atasi e tomanatu i upu a Iesu, avatu le fa'afetai, 'a'ai ma fafagaina ona auina atu lea e fa'asoa ma le 'au matitiva ma latou “i le taufa'asi'usi'u.” Ua toe aumai nei faiga ma avea ma fevaevaeaiga.

I lana lauga i Budapest, na fa'a'au upu a le Pope i upu ma molimau a Iesu o lē na fesili atu ia Pateru. “A o outou na, se a la outou upu ia te a'u nei, po o ai?” (Mareko 8: 29). Na tali atu le aposetolo, “O oe o le Keriso”, ma na sa'o lelei o ia. Ona vavao atu lea o ia iā Peteru e aua ne'i ta'u atu o ia o le Mesia ma “fa'aali mālie lona tagata moni, le paseka ua maua i le Eukalisitia.”

O le tala'iga a Iesu o le a mana'omia le te'ena ma le puapuagatia i luga o le koluse, ona o la tatou Mesia e le o se Mesia malosi i se manatu fa'alalolagi nei ae o se 'au'auna fa'akoluseina ua sasa'a mai o ia lava mo isi.

Na fa'alumanina Peteru i le tali a Iesu. Sa ia fa'alogoia le tauiviga laua'itele e le mafaufau e pei o se tagata, “e pipi'i i le fa'aeaea ma le mamalu ma avanoa...fa'asausili ma le paoa ae e pei ona faia e le Atua, “alo'ese mai le fa'aeaina, fa'aalialia ma le manumalō.” Ua le fiefia Iesu i le te'ea e Peteru o le mana, mamalu ma le avanoa ma fai atu i ai: Ina alu ia i o'u tua Satani e!” (Mareko 8: 33).

O le Eukalisitia ua fa'aosofiaina i tatou e “mulimuli i le savaliga a le Ali'i na sau ina ia 'au'auna atu ae le 'au'auna mai tagata iā te ia” ma le iloa o tatou o le Tino e tasi, ma le lotomalie ina ia tofifofiina i tatou mo isi”.

### Se va'aiga o mata mai le paneta o Mars

O a fa'aailoga ua tu'uina mai e le sakalameta o le Eukalisitia?

Afai o sē asiasi mai le paneta o Mar sa va'ava'ai

## O LE EUKALISITIA, LE KERISO, MA LE VALA'AUINA IA FA'ASO'OINA

i le Sauniga o le Misasa i le Fa'alatina, o le ā sa latou manatu i mea o faia e le aofia?

O le a latou va'aia se ali'i ua la'ei matagofie ma ana 'au'auna ma lona patua i tagata, pisapisa ai na o ia i luma o se aletale teuteuina i se gagana e le mailoaina, e masani ma ni pesepesega matagofie, ma i se taimi, o le au maimoa o le a to'otutuli i le pa puipui aga'i i le nofoaga pa'ia ina ia fafagaina e pei oni tamaiti.

O le Misasa i le mae'a o le Vatikano II ua aumai se ali'i ta'ita'i ua teuteuina lelei ma fa'afeloa'i le aofia i le latou lava gagana i tua atu o se aletale laititi. O faitauga ma tomanatuga i le tusi pa'ia ua mulimuli mai ai ma "tatalo fa'aositaulaga" ona laina mai le o tagata e talia le falaoa.

O le a maitauina lenei o se fa'apotopotoga ua tatalo fa'atasi ai ma pesepesega ma mea teuteu fa'aaganu'u ae le o se mea'ai ma uō fa'atamilo i se laulau.

Ona o le fa'ama'i ua ulufia ai a tatou fa'apotopotoga ma aiga, e leai se toe "fo'i i mea na masani ai." O se avanoa ua fa'atumulia e le kalasia lenei e fa'ataunu'u ai le folafolaga o le fa'afouga o le sauniga.

O tatou, o Tagata o le Atua, e tatau ona toe faimalaga fa'atasi i tua i upu ma molimau a Iesu o lē na tu'uina mai iā i tatou lenei matagofie, ola foa'i, ma le mealofa faifai pea o le mea'ai a fa'auō ua avatu le fa'afetai mo mealofa a le Atua, fafagaina mo le fa'aso'oina ma le alu atu e 'au'auna i le au matitiva ma latou ua "tau mamao atu."

**O le toe fa'afai maia o le Eukalisitia o se mea'ai**

Ua tatau ona tatou toe fa'afai isia mai le fa'apotopotoga, le mea'ai, le liu tino tagata, ma le taumauga i le au matitiva ma latou ua le ama-

na'iaina.

O le malaga la e tatau ona toe fo'i i le Ekalesia i le mae'a ole fa'ama'i ma le lalolagi e moni ai le lu'itau. O talitonuga fa'alelotu, i le Atua, le Afio Moni ai, ma le silisili'ese ua tulaga lamatia i o tatou lalolagi i tulaga lamatia fa'asaenitisi ma mea tau tupe. O le to'atele ua tu'ua le fa'atuatuga o ni tagata ua "fa'amalieina fa'alalolagi nei" ma e le lagonaina le leiloa, se fia 'ai mo le Falaoa o le ola.

O faiga fa'atenakolosi ua i ai nei ma e tumau ma e tatau ona fa'aogaina mo le fa'aevageliaina ae, e pei ona iloina i Misasa i tafa'ilagi, ua aumai ai ma ni vaega lavelave ma ua a'afia ai i tatou ini auala e le'i mafaufauina.

O le tapenaina o fanau mo le 'au ai i le Eukalisitia o se lu'itau tele ona ua latou masani i ta'aloga fa'apenei ae le o ni faigā tatalo.

O le toe fa'afai maia o le Eukalisitia o se mea'ai e mana'omia ai tulaga ia o le uiga, fausaga ma le la'ei.

E tatau fo'i ona va'ava'ai i le mou atu o mea'ai fa'aleaiga i meai fa'atau ma "faiga'ai i le afiafi i TV" le moni o sosaiete maumea ma le leai o ni me'ai e fafaga ai ma patipatia ai tagata ua fia 'a'ai a le lalolagi.

Ua tatou iloina nei ua talafeagai lelei le mata'itu a Pope Faranisisi ia Iesu ma po'o le a sa tatou tala o ai o ia.

I lana mealaoa o le Tausama'aga Mulimuli, na fafagaina i tatou e Iesu i le faigamalaga o le fa'atuatua ina ia tali atu ai i lu'itau mo le Ekalesia i le uma ole fa'ama'i.

## SAKALAMETA

**Talafa'asolopito i Tofiga Pa'ia:  
'Au'aunaga Kerisiano ma Tofiga Pa'ia**

I Israelu anamua sa i ai le tofi ositaulaga sa mani-

no lelei. O le tamā o aiga ta'itasi sa avea ma ositaulaga e si'i a'e tatalo ma le faitaulaga iā iova po'o atua Roma. I le mae'a o le Esoto (malaga) mai Aikupito, o le ituaiga o Levi ma Arona na



tauavea le matafaioi fa'aositaulaga ae ole taimi lava fo'i lea o le atunu'u atoa o Isaraelu ua fuafuaina o se 'malō o ositaulaga', o tagata filifilia ua vala'auina i le pa'iaga (Levitiko 19, 21).

O Iesu sa fa'aperofetaina ma fa'aositaulagaina, sa feso'ota'i atu le Atua iā i latou sa talitonu i le Atua ma tautala i le igoa o le Atua. Sa ia fa'amaopopoina se fa'apotopotoga o so'o fa'atasi ma ia, a'oa'o ia i latou ma fa'asoa le malamalama ma i latou. Ona o se ta'ita'i, sa va'aia e Iesu lana tala'iga i tulaga o le 'au'aunaga i lo le pule.

O ulua'i so'o, aemaise le to'asefululua na mafana ma Iesu, sa fa'atinoa le pule ma le ta'ita'iga i le au fa'atuatua ae, e pei o ia, sa malamalama i lo latou matafaioi o se tala'iga po'o le 'au'aunaga. Sa galulue o ni au matutua i fa'atasiga i fa'apotopotoga fou, tausiga o le lelei o tagata, a'oa'o ma tala'i ma faia fa'atasi ni fa'ai'uga e uiga i talitonuga ma faiga masani Kerisiano (Galuega 4 – 6, 8, 10, 15). Na foliga o Peteru ma Iakopo na va'aia o ni ta'ita'i o latou ae e le'i faia na o la'ua ni taupulega. O fa'ai'uga tāua e le au matutua fa'atasi ai ma le maliliega a le fa'apotopotoga.

O igoa na tu'uina atu i galuega na faia e le au fa'atuatua na avea ma ulutala mulimuli a o fa'asolosolo ona fa'aleleia atili galuega a le Ekalesia ae o ni upu fa'amatala masani i le gagana Eleni:

la tatou upu 'aposetolo' na sau mai le *apostolos*, lona uiga o se sui fa'alemalō po'o se amapasa, ona o le to'asefululua na auina atu e Keriso e ave le fe'au i tagata uma. O isi avefe'au po'o aposetolo na auina atu e avatu le Tala Lelei o le Keriso Toetu. O Paulo o se tasi fa'apea lana soa o Panapa ma isi ua ta'ua o latou igoa (Galuega 14: 14, Roma !6: 7).

O a latou galuega fa'apea latou uma sa 'au'auna i fa'apotopotoga o ni Tiakono (diakonia) o lona uiga 'au'aunaga.

le au toea'i'ina i fafo atu o Ierusalema sa vala'auina i isi taimi o episkopo i (epikopo), lona uiga ta'ita'i po'o le ovasia, ona sa latou va'aia le tulaga lelei o a latou fa'apotopotoga.

O le au toea'i'ina i taulaga ta'itasi, i le gagana Eleni *presbyteros* (priest – padre -patele) na tofia e va'aia galuega patino i fa'apotopotoga. I le amataga o lenei igoa sa foliga mai na fa'aogaina fesuisuia'i ma le *episkopos*. Mulimuli ane, o le upu *episkopos* ua fa'aoga na o mo le ta'ita'i e matua.

E leai ma se 'au'aunaga nei na fa'aoga i fa'aositaulaga i le manatu Katoliko mulimuli mai ai. I le fa'ai'uga o le seneturi muamua ua tuputupu a'e le malamalama'aga Kerisano i le tofiga fa'aositaulaga i tua atu o lo latou measina Iutaia. O Keriso sa va'aia o le ositaulaga sili ma o latou sa mulimuli atu iā te ia o tagata fa'aositaulaga, ae e le'i i ai nisi na tofia o ni ositaulaga.

O le tuputupu a'e atili o 'au'aunaga Kerisiano ma le malamalama'aga i le seneturi lona lua ma le tolu na ta'ita'ia ai i le tofiga i le Ekalesia ua fa'amaoti lelei ma o se tasi o lenei ua maitauina o le au'aunaga fa'aositaulaga. A o tuputupu a'e fa'apotopotoga Kerisiano mai nai aiga i 'a'ai ta'itasi i le faitau selau e o'o lava i le faitau afe i 'a'ai tetele, o fa'apotopotoga tetele ua mana'omia, e le gata i le fa'atonutonu ma le va'aiga ae siaki lelei le 'ese'ese a a'oa'oga ma fa'agalueaina ua tutupu mai lea taimi i lea taimi.

O nei tagata ma isi na 'au'auna i fa'apotopotoga i auala 'ese'ese sa mai le amataga na fa'apa'iaina i le tatalo ai i o latou luga fa'atasi ai ma le fa'aloaloaina ai o lima. O le sauniga o le fa'aulufaleina na amata mālie ona fa'amausalīina ma aloa'ia mo epikopo, faife'au ma tiakoono, 'fa'au'uina' i latou o ni au'auna i tofiga manino i le Ekalesia. O latou la ia ua amata ona va'aia o 'ituagasa' tagata ua fa'apitoa mo sauniga pa'ia e pei o faife'au Roma ma fa'amasino po'o ositaulaga Iutaia ma Levi. I le fa'ai'uga o le seneturi lona tolu ua masani Kerisiano i le vala'auina o latou faife'au fa'alelotu o se 'ositaulaga.'

I le fa'ai'uga o le fa'asauaga i le vaitau o le seneturi fa, na fa'aopopoina vave le fa'aliliuina o tagata matutua. O epikopo i 'a'ai tetele ua lē lava-tia ona patipatia se sauniga o le Eukalisitia se tasi mo a latou fa'apotopotoga pe maua uma fa'apotopotoga i tua atu o 'a'ai mo papatisoga. O le fa'ai'uga o le tofia o ni faife'au e suia epikopo ua alagata. Sa suia ai o latou tofiga e lenei faiga. I lo le fa'avaeina o se fono faufautua e galulue fa'atasi i se fa'apotopotoga e tasi, ua gaiioi e pei o ni tagata ta'ito'atasi i palisi 'ese'ese. O a latou tiute ua fa'asino tonu i sauniga ma le la latou pule ua va'aia o e sau e le mai le fa'apotopotoga ae mai le epikopo.

O le i'uga o nei suiga, o tiakono ua le toe tāua e pei o faife'au ma o isi taimi na tofia e fesoasoani i faife'au fa'apea epikopo. Ile seneturi lima o le tofi tiakono ua amata ona va'aia ua na o se sitepu aga'i atu i le tofi ositaulaga ma i le uma ai o le seneturi ono ua le toe va'aia le tofi tiakono tumau.

O isi ‘au’aunaga fa’aekalesia ua amata ona va’aia o se tofi e aga’i atu i le tofi faife’au ma a latou ‘au’auna o ni ofisa i le galuega fai a le Ekalesia. I taimi o le ituaiga o ositaulaga ua fa’asolosolo ona avea ma vaega fa’atulagaina, ua o gatasi ma vaega fa’atulagaina i galuega fa’asavili i Roma. Ae le gata i lea, o lenei ua va’aia epikopo ma faife’au o ni ositaulaga ua avatu i ai le avanoa ma sa’olotoga sa patipatia e faife’au Roma.

O Epikopo sa filifilia ona sa va’aia latou e i ai mealofa o le a’oa’oina ma le fa’atonuina. O lenei ua manatu o latou e i ai na mealofa, fa’apea le aiā tatau e fa’aoga ai, ona o latou o epikopo. O le au ositaulaga sa va’aia e i ai le atamai, le malosi po’o le paoa ma le paiaga ua vavae’ese mai ai i latou mai Kerisano masani. A o lenei, e ui i lea, na aumai ai ma le fa’amoemoega o latou e ‘ese, o ni fa’ata’ita’iga o vituti Kerisiano mo tagata e mulimulita’i ai.

I le vaitau o le au fai telosia anamua e to’atele epikopo na avea ma tala’i ma’oa’e le au fai telosia, na i’u ona fa’aigoaina o ‘Tamā o le Ekalesia’. E to’atele fo’i o ni sulii o aiga tu lelei ma le mau’oa ma sa masani ona galulue o ni fa’amasino fa’apea o ni faife’au.

O epikopo e masani ona asoa fa’aailoga o a latou tofiga i taimi o sauniga ae o faife’au e le tatau ona faia ni la’ei manino i isi taimi, vaganā ai le taimi na tusi ai Pope Celestine i nisi o epikopo i Gaul i le tausaga 428, fa’amanatu ia i latou ‘e le tatau ona fa’a’ese i latou mai isi Kerisiano i o latou olaga ma a’oa’oga, e lē o latou la’ei (Martos, p. 479). Mulimuli mai i le seneturi lima, e ui i lea, o le au ositaulaga ua amata ona la’ei i sulutaga o se fa’aailoga o le tulaga fa’asosaiete, i lo ofu masani ai e pu’upu’u. O le filifiliga mo lenei ofu sa fa’aauau pea e ui ua le toe i ai nei aso.

E pei ona fai mai ai tamā o le Ekalesia, o faife’au o ni tagata fa’asakalmeta ua auala mai ai le gaioga a le Atua i matafaioi uma fa’aositaulaga. O le fa’au’uina o ositaulaga ua avatu ai ia i latou le mana fa’aleagaga lava lea e tasi e suia ai le vai i le papatisoga, ma’a i le aletale pa’ia ma le falaoa i le tino ma le toto o Keriso. Sa malamalama lelei Aukusitino i lenei mana ose tautoga pa’ia e pei o le papatisoga ma le kofilimasio, fa’agae’etia i le agaga e tasi le taimi mo le olaga atoa. O le fa’au’uga sa malamalamaina o le fa’aloaloina o lima. O se galuega a le Agaga Pa’ia, na afua mai le mana o galuega a le Atua, tautala e ala mai lē o lo’o fa’atinoina le fa’au’uga.

O le tofi patele a le feagaiga fou, ua va’aia ua sili atu i lo le tofi faife’au a Arona ma Levi, sa malamalamaina e mana’omia se pa’iaga sili atu lo la’ua. Talu ai ona o le pa’iaga sa feso’ota’i i le latou lalolagi ma le mamā mai le agasala, i le leai o ni amioga fa’afeusua’iga fa’atasi ai ma nisi amioga, na ta’ita’ia i se mana’oga mo le leai o ni faiga fa’afeusuaiga na mulimuli ai agai atu i le nofo taupou.

O le fa’aletonu na mafua mai i osofa’iga a Siamani na faigatā ai ona fa’amalosia le tulafono, fa’atasi ai le tete’e i le fa’aosoosoga o le tino. A o aumau le au faife’au i nofoaga tutasi ma le mamao, e to’atele o latou na fa’aipoipo. O le avea o se monike ma Pope i le seneturi sefulutasi na fa’alatele ai le fa’afouga o le ituaigasa ma fa’atonuina ai loa ositaulaga uma lava a le Ekalesia Katoliko e nofo taupou...*fa’auau pea...*

## O LE TATALO A LE ALI’I – I SE LALOLAGI O LE KOVITI

**Lo Matou Tamā e o i le Lagi** – Ua matou vaivai ma le lē aogā e aunoa ma lau fesoasoani.

**Ia Pa’ia lou suafa** – ua matou vala’au i lou suafa ma punonou ifo ma fa’aloaloa atu o matou lima. O le pa’iaga o au foafoaga ua lamatia a o le Koviti matape’ape’a ua ta’alo i olaga.

**Ia o’o mai lou malō** – O le fa’ama’i o le Koviti o

lo’o fetauaiga i matou ua afua’ua ai fa’alavelave ma le lē fealofani, tu’u’ese’eseina, tu’ufua ma le maliu – ua tete’e i lou malō o le malamalama ma le kalasia ma le filemū. Ia puipui i matou i ou ‘a’ao alofa ina ia matou iloa ai le matagofie o lou malō.

**Ia faia lou finagalo ile lalolagi e pei ona faia ile lagi** – o lou alofa mo le lalolagi na auina mai ai

Iesu iā i matou; na auala mai ai lau Upu iā i matou. E i ai taimi matou te lē fa’alogo ai. O le fa’aogaina sesē o au mealofa ua mautinoa lava na mafua ai o matou fa’aletonu. Fesoasoani mai iā i matou e usita’ia lou finagalo i mea uma lava.

**Ia e foa’i mai i le aso nei a matou mea e ‘ai** – Ua fevaevaea’i i matou mai le tasi i le isi e le fa’ama’i o le Koviti, ua galala i le fia feiloa’i atu i isi ma ola fiafia i fa’apotopotoga. Fafaga i matou nei i le malamalama i le alagatau o a matou feso’ota’iga o le tasi i le isi ma le foafoaga atoa. Ia avea la matou tausiga ma le alofa o le falaoa e fafaga ai ola uma.

**Fa’amagalo iā te i matou iā matou agasala** – Ua matou fa’aleagaina ma fa’amaumau le anoanoa’i o au foafoaga. Ua matou manatu na o matou lava. Atonu o le mafua’aga lenei ua osofa’ia ai e le Koviti le tagata. Ia fafagu i matou i o matou ‘ese’esega. Fa’amagalo o matou manatu fa’apito, o matou fa’atamala ma le matape’ape’a.

**E pei o i matou foi ona matou fa’amagaloina atu i ē ua agaleaga mai iā i matou** – e faigofie ona lagonaina ua agaleagaina, tu’ua’ia isi mo a tatou fa’aletonu. Ae o le fa’amagaloina o se fa’aleleiga, e mālū, filemū. Ave’ese atu ma i matou le inoino, e pei o le Koviti, ua fevaevaea’i ai ma fa’aleagaina ai. O le leai o se fa’amagaloga ua taofiofi ai le alofa.

**Aua fo’i e te ta’ia’iina i matou i fa’aosoosoga** – O le fa’ama’i o le Koviti – 19 ua fa’aalia mai ai le itū leaga o le fa’ate’a. O le faitoto’a lea o le nofo to’atasi ma le fa’atāma’ia o fa’apotopotoga. Lavea’i i matou mai fa’aosoosoga e fa’ate’a i isi, fa’aleagaina faigauō. O le mailei lenei na faia e le Koviti. Puipui mai iā i matou.

**A ia e lavea’i iā i matou mai le leaga** – lavea’i i matou, le Atua agalelei ma le alofa. Aumai i matou mai nei taimi leaga ma o matou fa’atuatua ma le alofa tele, ma se va’aiga manino i lau mealofa tāua o le ola, ma se malamalama atoatoa i au matafaioi i le lalolagi e pele iā te oe.

**Auā o ‘oe e ou le malō le mana ma le vi’iga e fa’avavau fa’avavau lava.**

## **Na Fa’amalosia e pei o Iesu Keriso e Sola’ese**

I le tala’aga a le Ekalesia, e to’atele Pope na ta’ua le Aiga Pa’ia pe a talanoa i le tausiga o tagata sulufa’i ma tagata faimalaga. O Pope Pio XII i lana fa’avae fa’aaposetolo, *Exsul Familia Nazarethana* (1952) sa tusia:

*O le Aiga Pa’ia o Nasareta, na sosola atu i Ai-*

*kupito, o se fa’ata’ita’iga lelei o se aiga ua sosola ‘ese atu mai le nu’u moni.*

Ua tosigā e Pope Faranisisi i tatou i tua i le Aiga Pa’ia ina ua fa’atalanoa mataupu tau i tagata faimalaga ma tagata sulufa’i. Sa ia fa’atusa tulaga na o’o i ai le Aiga Pa’ia ina ua sosola atu i Aikupito i le malaga na faia e le anoanoa’i o tagata faimalaga ma tagata sulufa’i. E pei o le tulaga na o’o i ai le tamaitiiti o Iesu mai le fa’asauaga mai le Tupu o Herota, ua fa’amanatu mai e Pope Faranisisi iā i tatou “o le ‘afa o tagata sulufa’i i nei aso i le lalolagi o tamaiti, latou na a’afia i le leai o se amiotonu o le tagata” (Pope Faranisisi 2018).

*O Sagato Iosefo ole sulufaga fa’apitoa mo latou ua tu’ua fa’amalosia latou nu’u moni ona o taua, itagia, fa’asauaga ma le mativa.*

I lana tusi fa’aaposetolo Patris Code (2020), i le fa’amanatuina o le 150 tausaga talu ona fa’avaeina o Sagato Iosefo o le sulufaga o le Ekalesia aoao na folafolaina ai e Pope Faranisisi o le Tausaga a Sagato Iosefo ma avea ai Iosefo o le “sulufaga fa’apitoa mo latou uma na fa’amalosia e tu’ua a latou atunu’u moni ona o taua, itagaia, fa’asauaga ma le mativa.”

Na fa’amatala e Faranisisi Iosefo o se tagata faimalaga ona sa fa’atonuina o ia e le agelu i se miti e ave Maria ma Iesu ma sosola i Aikupito (Mataio 2: 13 – 23). Na toe fa’amausalī mai e Pope Faranisisi le loto tele a Iosefo i le fa’atuatua na tu’uina atu e le Atua iā te ia mo le ‘oa aupito sili le tāua a lo tatou fa’atuatua – Iesu Keriso ma Maria lona Tinā.

Fa’atasi ma le miliona o tagata ua fa’aanu’ua nei, ua tatou va’aia ai le anoanoa’i o Iosefo i aso nei ua tu’ua fa’atasi ma aiga o latou atunu’u. E to’atele ae fa’apitoa i lenei tausaga o Sagato Iosefo, ua tatou va’ava’ai i le tamā fa’alalolagi nei a Iesu o se fa’ata’ita’iga o le fa’atuatua ma le loto tele atoatoa.

O le Caritas Fa’alalolagi ua Fa’asoaina le Faigamalaga

Ia Setema 2017, o le Caritas i Malō a le lalolagi na fa’avaeina se taumafaiga fa’alalolagi nei i le aganu’u o le feiloa’iga i le tulaga i femalaga’iga fa’alalolagi, ua fa’aigoaina *Fa’asoa le Malaga* (Share the Journey - STJ). I le fatu o lenei mataupu (STJ) le vala’au a Pope Faranisisi ina ia fausia se aganu’u o le feiloa’iga. O le autū o lenei mataupu mo vaega o le Caritas i le lalolagi atoa, e a’afia ai le Caritas a Aotearoa Niu Sila, e fa’agai-oia nei taumafaiga fa’atasi ma tagata fai malaga ma latou na avea ma tagata sulufa’i e fa’amalosia le feso’ota’iga ma tagata. O lenei taumafaiga mo



le 4 tausaga na fa'atupu teleina ai le fa'amoemoe ma le avanoa o le mafutaga mafana ma tagata fai malaga ma le tagata sulufa'i.

## O LE TATALO O LE TA'UTINOGA O LE FA'ATUATUA

### NAISIA/NICENE

O le tatalo o le fa'atuatua na fa'aliliu mai le upu Peretania – '*Creed*'. O le upu lenei sa sau mai le upu Latina *credo*, o lona uiga i le fa'a – Samoa '*ou te fa'atuatua*'. O le mea lea o lenei tatalo o le tu'ufa'atasia o fa'atuatua. Aemaise lava i le ulua'i selau tausaga i le mae'a o le maliu o Keriso, sa feagai atu le ekalesia ma fa'afitauli o le 'ese'esega o manatu ma taofi i mataupu e pei o Iesu o le Atua moni ma fa'apea le fesiligia pe e iā ia le natura fa'aletagata ma le natura mamana. Mai ia finauga na faia ai e le ekalesia ni fa'amatalaga o le fa'atuatua, i nei aso ua fausia ai se vaega tāua pe fa'apefea i kerisiano ona fa'aalia lo latou fa'atuatua. Se'i o tatou va'avaai i nei tatalo tāua ua aumaia se fa'apu'upu'uga o le talitonuga Kerisiano.

### O LE FA'ATUATUA O APOSETOLO/APOSTLES' CREED

O lenei tatalo e masalomia o se tasi o ulua'i tatalo na fa'aogaina i le Fa'akerisiano i aso nei. O le igoa na sau mai le tala'aga o aposetolo e toasefulu-lua a Keriso na faia lo latou sao i vaega pu'upu'u ma o a'oa'oga, e ui o le vaega na muamua atu ua

fa'apea e mai le c.215. O le tatalo ua manino mai ai se fa'aupuga o le talitonuga Kerisiano ma fausia ai le fa'avae mo tatalo na mulimuli mai ai. Ua aumai ai a'oa'oga "i le mamalu faigofie (mamalu), i le lē mafa'atusalia (matagofie), i le fa'asologa matagofie ma le sauniga mamalu (pa'ia)"

### O LE TATALO NAISIA/NICENE CREED

O le fa'aailoga o le fa'atuatua ua fa'aoga laua'itele i sauniga Kerisiano ua ta'ua o le Naisia ona na mua'i fa'aogaina i le taulaga o Naisia e le Ulua'i Fono a Naisia i le tausaga 325. O se fa'amatalaga ole fa'atuatua ma na o le pau lea o le Tatalo a ekalesia tu'ufa'atasi ona ua fa'aogaina e Katoliko Roma, Ekalesia i Sasa'e, Egelani, ma Porotasano Autū.

O le Tatalo Naisia e masani ona fa'aogaina e Kerisiano. Mulimuli mai ai na toe Iloilo e le Fonotaga i Constantinople i le tausaga 381. I lenā taimi o lo'o tauivi le ekalesia ma a'oa'oga sesē Arian, na tineia o Keriso o le Atua moni lea, ae fai mai o se tagata na foafoaina. Na toe faia fa'alelei e te'ea ai le mau Arian ma fa'amatala manino lelei mai ai o Keriso e fa'avavau ma o le vaega o le tasitolu pa'ia o le Tamā, Alo ma le Agaga Pa'ia.

I lālā uma o le Fa'akerisiano, o lenei tatalo o lo'o fa'aogaina i aso nei. Mo se fa'ata'ita'iga, i Misasa ta'itasi uma a le Ekalesia Katoliko Roma, ua fa'aogaina o le ta'utinoga o le fa'atuatua.

## O SE FA'ATUATUAGA O LE ASO FARAILE PA'IA

O Evagelia Sinopi ta'itasi ua fa'amatalaina le tala o le fafine, na a'afia i le mai o le 'puna toto' i le tele o tausaga, na fa'amaloloina i le pa'i atu i le ofu a Iesu (cf. Mataio 9: 18 – 26, Mareko 5: 25 – 34, Luka 8: 43 – 48). O se tusitusiga mai le seneturi e fa, *Galuega a Pilato*, ua fa'aigoaina lenei fafine o Bernice ma ua fa'amatalaina mai lona alu atu i Roma, fa'amalolo le tupu o Tiperio e ala i se fa'atusa o Keriso sa ia tusia e fa'afetaia ai lona fa'amaloloina; ina ua maliu o ia, o le ofu na tu'ui-na atu lona va'aiga ia Pope Sagato Clement 1. I le taimi lava lea, o Sagato Eusebus o Sisiria na fa'amatalaina le isi tala o le fa'afetai:

O le fafine e ma'i 'puna toto', e pei ona tatou iloa ina mai evagelia na fa'amaloloina e lo tatou Fa'aola, sa fa'apea na sau mai (Kaisaria Philippi). O lona fale o lo'o i le taulaga ma o se fa'amanatu o le penefiti na avatu e le Fa'aola i ona luga o lo'o

i ai pea lava. I luga o se ma'a maua luga i le faitotoa o le fale o lo'o tu ai se fa'atusa apa memea o se fafine, o lo'o to'atuli ile tuli vae e tasi ma fa'alaloa atu ona lima. Fa'asaga mai i ai o se isi fa'atusa, o se ali'i o lo'o tu sa'o ma o lo'o ta'ai i luga o ona tau'au ni 'ie se lua ma lona lima o lo'o 'a'apa atu i le fafine...O le fa'atusa ua fa'apea e foliga ia Iesu. (*Ecclesiastical History* vii. 8).

I tu masani i Sisifo, o Bernice, le fafine na fa'amaloloina mai le 'puna toto' ma o lona igoa na i ai se feso'ota'iga uma ma le fa'atusa o Keriso, ua lauiloaina o Veronika, le fafine i le Sekasio lona ono o le Ala ile Koluse na alofa atu ia Iesu, na solo le toto ma le āfu mai ona foliga a o aga'i atu i Kalevalio.

E ui e tele ni taumafaiga i seneturi ua tuana'i e fa'avae se ta'ala'aga mo Veronika, e leai ni moli-

## O SE FA'ATUATUAGA O LE ASO FARAILE PA'IA

mau o ia tagata o se tala fa'asolopito. O le mea moni e le'i a'afia lava Veronika i se lisi aloa'ia o tagata pa'ia ma e ui e fa'amanatu o ia iā Iulai le aso 12 i le Ekalesia Orthodox, e le'i i ai lava se fa'amanatuina o se sulufaga fa'alaua'itele a Sagata Veronika i Ekalesia i Sisifo. E foliga mai o le tala'aga ia Veronika o se fausaga mai vaitau oga-tononu e fa'amatala ma lagolagosua ai tupu'aga o fa'atusa o Iesu o lo'o i falesa ta'itasi i Europa. O le sili ona tāua o nei mea tāua mai anamua o lo'o teuina i le Paselika a Sagato Peteru ua iloaina nei o le 'Veli a Veronika'.

Ae o ia lenā. E ui i le leai o ni fa'amaumauga e lagolagoina ai, o le tala i lenei fafine agalelei ua fa'alua i totonu o le tele o falesa i le lalolagi ma o se vaega ua fa'apipi'i i tatalo ma tapua'iga a Kerisiano, aemaise le aso Faraile Pa'ia.

Ua ta'u mai iā i tatou e Luka e tele fafine na fa'atasi atu ma Iesu i lana galuega fa'apea le tai-mi na amo ai lana koluse (cf. 8: 1 – 3; 23.27 & 49). Ua foliga mai ua alagatatau i nei fafine loto tetele, ua o'o lava i le fafine na fa'amaloloina mai le 'puna toto', o le tula'i mai ma fa'ailoa atu le agalelei ia Iesu a o savali atu o ia i lona fa'akoluseina. Atonu o le aso Faraile, le aso na maliu ai le Atua, o sē na mulimuli na fa'atinoa ana a'oa'oga ma a'apa atu ma le alofa, ma fa'ailoa i le tagata o le oti o lo'o i ai lava i latou e alolofa atu ia te ia.

E to'atele le au atamamai ua aumaia se mau o le igoa o Veronika ua fausia mai ni upu se lua: *vera* (Latina mo le "moni") ma *eikon* (Eleni mo le "fa'atusa"). E ui o le igoa ua manatuina o se faiga na avatu i le suafa na tu'uina atu i le "fa'atusa moni" o Keriso o lo'o fa'aalia mai i ni 'ie, o se suafa ua matagofie ma talafeagai mo lenei fafine, o ia lava o se fa'atusa moni o se Kerisiano. Ma, ua lu'itauina ma mafanafana ai i tatou i le manatu o Verinoka o se fafine na fa'amaloloina mai le puna toto. Fa'afetai mo le mealofa o le ola fa'afouina, ua ia fa'aalia lona agaga fa'afetai ma le alofa i le gaioiga ole loto malosi ma le agalelei, na mafua ile alofa, sa ia maitauina i tua atu o le toto ma le toto masa'a o le i ai o Keriso ua ia alofagia ma o lē ua ia talitonu i ai. I lenei Aso Faraile Pa'ia, a o tatou toe manatuaina le mealofa tele na aumai e le Atua ia i tatou, le gaioiga alofa a Veronika o se fa'amanatu malosi ua vala'auina i tatou e avea ma tagata ole agaalofoa:

O se fafine ua alu'ese mai le motu o tagata, o lo'o fa'amumū pea le molī o tatou tagata, ...ma solo ona Foliga ma maua lona Foliga! E

to'afia  
ni tagata i nei aso e leai no foliga! E to'afia ni tagata  
ua tu'u i le taufa'asi'usi'u o le olaga,  
tu'ulafoa'ina,  
fa'aunu'ua, tu'ulafoa'ina le lē amana'iaina.  
Ua na o latou ua mumū ai le afi o le alofa  
o lo'o ola moni, latou ua ifo to'ele i luma o Keriso  
o lo'o puapuagatia ma fa'atalitali i tatou ia i latou  
O lo'o puapuagatia: o le asō! O le asō! Ona o taeao o le a tuai!  
(Angelo Cardinal Comastri).

Mo tatou o lo'o ta'uta'u e mulimuli iā Iesu, o le fa'atuatua o le Aso Faraile Pa'ia a Veronika o se lu'itau e va'ava'ai ai i le lalolagi o lo'o si'o-si'omia ai i tatou ma latou o lo'o i ai, i mata o le fa'atuatua. O le gaioiga a Veronika o le alofa ua avea ma fa'ata'ita'iga o le alofa Kerisiano, e pei ona fa'aalia e Ioane Paulo Pa'ia II: O lenei tala e mafai ona i ai se isi uiga pe afai e fuafua i le mal'amalama'aga i upu a Keriso e uiga i aso mulimuli. E to'atele o le a fesili: Le Ali'i e, o anafea na faia ai nei mea mo oe? Ma o le a tali Iesu: '*E moni ou te fai atu ia te outou, e pei ona outou, auā na faia e outou i le tasi o e aupito itiiti o o'u uso nei, o a'u lea na outou faia i ai*' (cf. Mataioa 25: 37 – 40). O le mea moni lava na tu'ua e le Fa'aola ni tulaga fa'aailoga i galuega uma ta'itasi o le agalelei, e pei ona ia faia ile 'ie a Veronika' (*Via Crucis*, 2003)

O Se Tatalo mo le Aso Faraile Pa'ia

Le Ali'i e, aumai ia i matou ni loto e lē mapu lelei, loto o lo'o sa'ili i ou foliga. Aua ne'i fa'atauasoina o matou loto ua va'aia na o tua mai. Aumai ia i matou le faigofie ma le mamā ua mafai ai ona matou maitauina lou afio ai i lenei lalolagi. A matou le mafai ona ausia ni mea tetele, aumai ia i matou le loto tele ua fanau mai le loto mauualalo ma le agalelei. Fa'aali mai ou foliga i o matou loto. Ia matou feiloa'i atu ia oe i le ala ma fa'aali lou fa'atusa i le lalolagi. (Pope Penitito XVI (*Via Crucis* 2005).

## FAITAUGA MO LE MASINA O APERILA 2022

Aso 3 Aperila Aso Sa 5 o le Fagafulu: Faitauga muamua: Isaia 43: 16- 21. Matua: 'Ou te faia se mea e fa'atoā iloa; auā 'ou te avatu vai i le vao lafulafuā, e feinu ai lo'u nu'u ua 'ou filifilia.

Salamo: 126: 1 – 2 (tali, 3 (tali), 4 – 5 (tali), 6 (tali). Tali: Ua faia e le Ali'i mea tetele mo i tatou, ua tatou fiafia ai.

Faitau lona lua: Filipi 3: 8 – 14. Matua: Ua ou fa'aleaogaina mea uma ina ia 'ou maua Keriso.

### FUAIUPU MO LE EVAGELIA

Inā lafoa'i ia o outou solitulafono uma ua outou solitalufono ai, ma ia fai mo outou se loto fou, ma se agaga fou.

Evagelia: Ioane 8: 1 – 11. Matua: O so outou e leai sana agasala, ia lua'i togi se ma'a iā te ia.

### Tofitofiga o le Upu:

Mo tagata Isaraelu o le Esoto (po'o le malaga 'ese atu) o le ulua'i gaioiga lea o le fa'aolataga. O le Ali'i na gaii ina ia mafai e tagata Iutaia ona sosola 'ese mai Aikupito mai le sauaga a Farao i le Sami Ulaula, ma o lenā mea ta'ua na tupu na avea ma fa'avae o la latou feagaiga ma le Atua. O le talanoa i ni tagata ua fa'aaunu'ua, ua ofoina mai e Isaia se va'aiga fa'atupu fa'alavelave ma le lu'itau: o a mea o lo'o faia e le Atua mo ona tagata ua sili atu e o'o lava i mea na tupu i le sosolaga (Esoto)! O le a toe fa'afo'i e le Atua ona tagata i o latou 'ele'ele, ma toe aumai uma le 'au fa'aaunu'ua ma le 'au sulufa'i i le Nu'u na folafolaina i o latou Tamā. O se mea fou lenei ua fa'aalia ai le agalelei o le Atua i ona tagata ma fa'ataunu'u ai feagaiga uma na folafolaina, e ui i le faigatā i le va'ai.

O le faitauga matagofie mai le evagelia ua aumai mo tatou i le asō ua tau manino mai e lē o se mua'i vaega mai le evagelia a Ioane – e i ai ni mafuaga tatau e fa'apea na mua'i sau mai iā Luka. Ae ui i lea, ua fa'aaloalogia e le Ekalesia lea o se kanone, ma ua ofoina mai se avanoa matagofie e tomanatu ai i fa'amasinoga ma le alofa – o ni sini ta'ua tele mo le Fagafulu. I se tasi o va'aiga o le pisapisaō ma le fa'amisa a o toso atu le fafine i luma o Iesu e tagata ua manana'o mo le toto. I le isi va'aiga o lo'o i ai le filemū ma le leai o se pisa a o tusitusi Iesu i le palapala ma na o le tasi le upu na tautala ai i le motu o tagata a o tūtū le fafine e leai ma se leo. E leai se manatu o le fa'ata'apeina o le motu o tagata i sana upu na manatu ai Iesu e lē tāua le agasala a le fafine, ae o le fa'amamafa o le tulaga o lē na mafai ona fa'amasino, o ia fo'i lea na fa'anaunau e alofa. O le faiga masani a le Fagafulu o le patipatia o le sakalameta o le togisala ua vala'auina ai i tatou uma ina ia tūtū i le paganoa i luma o le Ali'i tu'ua'ia i le lē fa'amaoni i le feagaiga ma fa'aloge e lē o upu o le tu'ua'iga, ae o upu o le alofa.

### ASO SA O LE LAUPAMA

Aso 10 Aperila - Faitauga muamua: Isaia 50: 4 – 7. Matua: 'Ou te le'i ufiufi o'u mata i le mā ma le feanu.

Salamo: 27: 7 – 8 (tali), 16 – 17 (tali), 18 – 19 (tali), 22 – 23 (tali). Tali: Lo'u Atua e, lo'u Atua e, se a 'ea le mea ua e tu'ulafoa'i mai ai iā te a'u?

Faitauga lona lua: Filipi 2: 6 – 11. Matua: Ua fa'amaulalo o ia e ia lava; o le mea lava lea ua matuā fa'aeaina ai o ia e le Atua.

### FUAIUPU MO LE EVAGELIA

Ua 'ana'ana Keriso mo i tatou ua o'o ina maliu, o le maliu lava lea i le koluse. O le mea lava lea ua matuā fa'aeaina ai o ia e le Atua ma foa'iina atu ai iā te ia o le sua e silisili i sua uma lava.

O LE TALA I PUAPUAGĀ MA LE MALIU O LŌ TATOU ALI'I O IESU KERISO MAI LE EVAGELIA...

Luka 22: 14 – 17.

### Tofitofiga o le Upu:

O le ta'amilosaga e tolu o faitauga i aso Sa ua aumaia iā i tatou o evagelia sinopi 'ese'ese i tausaga ta'itasi ma o lona uiga ua tatou fa'alogologo i le tala ole Pasio a lo tatou Ali'i i ni va'aiga 'ese'ese i ia taimi, ma ua tatou maua ai fo'i ma le avanoa e fa'atusatusa ai ma le Pasio e pei ona fa'amatalaina e Ioane ua tatou fa'alogologo i ai i aso Faraile uma o le Eseta. A tatou maitauina autū a tusi evagelia ta'itasi ua mafai ai loa ona tatou fa'aloloto o tatou malamalama'aga fa'atelosia i le Pasio a le Ali'i. O nisi vaega o le leo a Luka ua iloa lelei i le Tala o le Pasio – o se fa'amamafa i le agalelei, fa'amalologa, fa'aleleiga, le agamalū o le Ali'i ma le agamalū a Luka i aposetolo ua mafai ona iloa atu. I le



## FAITAUGA MO LE MASINA O APERILA 2022

maitauina o se mea e uiga 'ese iā Luka ua mafai ai ona tatou iloa atu le faiga na ia mana'o ai e tu'u mai ai le Pasio, o le leai o se fa'amoemoe e pei ona taumafai i ai Mareko, e lē o se manumalō e pei ona faia e Ioane, ae o se gaioiga tele o le fa'aleleiga ma le fa'amaloloina.

I le taimi na saisai ai sa leai se fa'aletonu ma o se tasi o latou ia na taia – e pei ona fai mai isi evagelia – ae ua na o Luka ua fai mai na fa'amaloloina e Iesu le tagata manu'a. E le o ta'ua maia na ta'ape ma sosola le 'au aposetolo, ae ua ta'u mai i le fa'ai'uga 'o ana uō na matamata mai se mea mamao.' E le'i fe'ita le motu o tagata iā Iesu – sa mulimuli ma le tagiauē ma le fa'anoanoa, ma i le mae'a ole fa'akoluseina na ō i o latou aiga ma tatu'i o latou fatafata'.

Ua na o Luka ua aumaia le taimi na a'afia ai Herota, ae e lē o ia po'o Pilato na manatu o Iesu na agasala, ma na fa'amatala mai na fa'aleleia Herota ma Pilato ina ua ave'ese atu Iesu. O Luka fo'i ua aumaia le fafine Ierusalem na mulimuli i le Ali'i ma tagi: 'Tama fafine a Ierusalem e, sōia le tagi iā te a'u, a ia outou tagi iā te outou, atoa fo'i ma a outou fanau.' Ua tu'uina mai e Luka le 'gaoi lelei' o lē na maitauina o ai Iesu ma na folafola atu iai parataiso. O le Pasio lenei na talosaga ai Iesu mo le fa'amagaloga o latou na fasiotia o ia: 'Latou te lē iloa le mea ua latou faia.' Ma ile i'uga na fa'amatala mai na tu'uina atu lona ola o se gaioiga o le fa'atuatua: 'Lo'u Tamā e, 'ou te tu'uina atu lo'u nei agaga i ou 'a'ao.' O le tala a Luka ole pasio o lo'o atagia mai ai le telosia a Iesu – o Lē na sau e fa'aleleia ma fusifusia, na alu ma le loto atoa e fa'ataunu'u lana matafaioi o le fa'aleleia o le lalolagi i le Tamā, ma ua va'aia e se tasi e i ai le loto lelei – e pei o le seneturi, ma le anoanoa'i o so'o i aso nei.

### O LE MISASA O LE PASEKA I LE AO

Aso 17 Aperila - Faitauga muamua: Galuega 10: 34, 37 – 43. Matua: O i maua nei lava sa matou 'a'ai ma feinu ma ia, ina ua toe tu mai o ia i e ua oti.

Salamo: 118: 1 – 2 (tali), 16 – 17 (tali), 22 – 23 (tali). Tali: O le aso nei ua faia e le Ali'i, ia tatou olioli ma fīafia i ai.

Faitauga lona lua: Kolose 3: 1 – 4. Matua: Ia outou saili i mea o i lugā, o i ai Keriso.

Aleluia, Aleluia...O Keriso la tatou paseka ua fasia mo i tatou; ia tatou faia le tausamiga ma le fīafia i le Ali'i...Aleluia!

Evagelia: Ioane 20: 1 – 9; Matua: Tatou nonofo ma i maua nei, auā ua tau-gagaifo le la, ua lata i le afiafi.

### ***Tofitofiga o le Upu:***

O le evagelia o le asō e foliga mai e 'ese i le to'atele – e leai ni vevesi ua aumai e uiga ile Toetū. E tau leai ni molimau ma ua na o nai 'ie ma le auala ua fa'aalia mai ai. O Ioane ua si'itia ma avea ma so'o ua masani ona fa'amatalaina o se 'so'o alofagia'. E mafai ona fa'apea o le autū lea o le faitauga lenei; ua mafai e Ioane ona fa'amatalaina fa'ailoga fa'atauva'a o 'ie mo tu'ugamau, ona o lona alofa ua ia mauaina ai le loloto o le va'aiga i le moni o le tasi sa ia iloina ma alofa atu iai. O le molimau lea a Iesu ma i tatou e fa'avae i lona alofa mo le tagata ma le alofa ua mafai ona toe tau'i atu.

E tataua ona tatou maitauina i lana lauga tele ia Konelio ma lona auaga, sa fa'amamafa malosī e Peteru o ia ma latou sa latou fa'atasi o molimau a'ia'i i le Keriso Toetū. Sa matou 'a'ai ma feinu ma ia i le uma o lona toetu mai le oti. Na avea lenā ma vaega masani o tala o le fa'aaliga a Iesu i le uma o le Toetū. Na feiloa'i atu le Ali'i ma fa'asoa mea'ai ma ona so'o. O le Fa'akerisiano e le o se Tulafono o

## FAITAUGA MO LE MASINA O APERILA 2022

le olaga po'o se va'aiga fa'alalolagi, ae o se mafutaga fa'apa'aga ma le Ali'i Toetu – ma ia mailoaina ma feiloa'i atu i ai. O Kerisiano o latou ua iloaina Iesu Keriso, ma, e pei ona faia i taimi uma e patipatia ai le Eukalisitia, 'na matou 'a'ai ma feinu ma ia.'

### “DIVINE MERCY SUNDAY – ASO SA O LE AGAALOFA”

Aso 24 Aperila - Aso Sa 2 o le Paseka: Faitauga muamua: Galuega 5: 12 – 16. Matua: Ua atili ai ona fa'aopoopoina i le Ali'i o e fa'atuatua, e to'atele o tane atoa ma fafine.

Salamo: 118: 2 – 4 (tali), 22 – 24 (tali), 25 – 27 (tali). Tali: Vivi'i atu ia outou i le Ali'i, auā e lelei o ia.

Faitauga lona lua: Fa'aliga 1: 9 – 13, 17 – 19. Matua: Sa ou oti, fa'auta fo'i, 'ou te ola e fa'avavau lava.

Aleluia, Aleluia... Toma e, ua e fa'atuatua, auā ua e va'ai mai iā te a'u. Amuia o e le va'ai mai, ae fa'atuatua mai pea... Aleluia.

Evagelia: Ioane 20: 19 – 31. Matua: Ua mavae aso e valu, ua maliu atu Iesu, ua tu fo'i o ia i totonu.

### *Tofitofiga o le Upu:*

Talitonu ma le masalosalo o ni pa'aga fa'anatura nei e momoe fa'atasi. Talitonu e ola tele i le vaitau o le masalosalo. O le mautinoa o le malaia lea i le fa'atuatua. I le tu'uina atu o ia i le su'esu'ega, na fa'amaonia e Keriso le fa'alatalata atu a Toma. E le tatau ona tatou matata'u e fesiligia lo tatou fa'atuatua.

A tupu se mea uiga 'ese i le lalolagi i ona po nei, mo le fa'ata'ita'iga le fanaina o le peresetene a Amerika o John F. Kennedy, na manana'o tagata mo ni fa'amatalaga. Ua aumai se mana'oga mo se su'esu'ega fa'alaua'itele. E masani o se Fa'amasino mai le Fa'amasinoga maua luga e talosagaina e ta'ita'ia le su'esu'ega. Afai o le mea na tupu i le aso Sa o le Eseta ile lua afe tausaga talu ai na tupu i nei aso o le a i ai se vala'au mo se su'esue'ga vave fa'apea. Afai ua sau se lipoti fa'apea o se tagata ua toetu mai le oti, o le a ave ma fa'aulutala i le lalolagi atoa ma aumai se finauga e fa'ailoa uma tulaga pe na fa'apefea ona tupu lea mea.

O mea uma na tupu ua tusia i evagelia uma ua faigofie ai ia tatou ona va'ai fa'aletino i ia su'esu'ega. O molimau na na fai mai na va'ai ma feiloa'i atu ia Iesu toetu o le vala'auina ma su'esu'e māl'oi'o lelei. Muamua o lona maliu e tatau ona fa'amausalina. E leai se fa'aletonu o lea vaega ona o se mea na tupu i le nofoaga lautele ma e to'atele latou na molimauina. O lona maliu sa mata'utia le sauaina ma e ofogia e le'i maliu ae le'i taunu'u i kalevalio. E molimauina e latou e lē fa'aitu'auina e pei o fitafita, le ali'i na fesoasoani e amo le koluse ma isi. Ona i ai lea o le fitafita sa fia mautinoa ua maliu o ia, sunu'i le tao i lona autafa. Sa i ai Iosefa o Arimataia na fesoasani e tu'uina o ia i le tu'ugamau a o ta'ai e fafine lona tino i 'ie. Le uiga i lona maliu e leai se finauga tele.

O lona toetu mai le oti o se tala e 'ese atoa. O molimau o le vala'auina ta'ito'atasi ina ia fa'amatala a latou lava tala. O Maria Matalena o le a muamua lana molimau. Sa ia mauaina le tu'ugamau ua leai se isi o i ai. O le isi fafine ua molimau i le mau. E masalomia le afe o ni fa'amatalaga mo lenei mea. Ua pau le fa'amatalaga e lē talitonuina ua toetu mai o ia mai le oti. Afai ni su'esu'ega o le a fa'apea mai latou na va'ai i agelu. A tupu lenei i se fale fa'amasino i aso nei manatu i se tōē ma le ulagia. O Maria Matalena o le a fa'amalosia e fa'ailoa ina ua ia feiloa'i atu ia Iesu, na te le'i maitauina o Iesu. O le a faigofie ona fa'aleagaina o ia o se molimau lelei, ae le ta'ua ai lona tagata i taimi ua tuana'i.

O Peteru o le isi o le a soso'o ona fa'atautōina, soso'o mai ai ma Ioane. E faogifie ona fa'aleagaina Peteru. So'o se foma'i fa'apitoa i le mafaufau e mafai ona fa'ailoaina o Peteru ma Ioane na mafatia



## FAITAUGA MO LE MASINA O APERILA 2022

tele i aso e lua talu ai. Na fa'aletonu o la olaga. Na lalafi, ua matata'u fa'apea o la'ua o le a soso'o. O le 'au'auna teine o le a molimau o Peteru na tautō fa'atolu na te lē iloaina Iesu a o faia le fa'amasinoga. O so'o e to'alua i le ala i Emau sa fa'aalu sina taimi ma ia ae le'i maitauina o ia. O le tele ma le anoanoa'i o nei molimau.

Mulimuli lava, o le taimi mo Tomasi e molimau ai. O ia na musu e talitonu i tala fe'ave'ai ua toetu mai Iesu mai le oti. Sa ia tapā ni molimau. Leai ma se isi mea ua na ona tu'u o ona lima i manu'a o Iesu. Afai e lē o pepelo, o la ua tautala i le sa'o. Ua pau lenei o se molimau fa'amaoni e mafai ona talia e fa'amasinoga i aso nei. Ona o lenei ua leaga ai lona igoa mo le lua afe tausaga. Ua ave i ai le igoa o "Tomasi le masalosalo" ua gagana ai tagata i nei aso. Ma e lua ni mafua'aga e lē talafeagai ua lauiloa ai o ia. Muamua, na tu'uina atu e Keriso o ia lava i le su'esu'ega a Tomasi. Mafua'aga lona lua ua aumai i lona mulimuli o le evagelia o le asō:

*"O isi fo'i fa'aailoga e tele na faia e Iesu i luma o ona so'o, e le'i tusia i lenei tusi. A ua tusia ia mea, ina ia talitonu ai outou, o Iesu o le Keriso lava ia, o le Alo o le Atua; ina ia maua ai fo'i le ola i lona suafa e outou o e talitonu"* (Ioane 20: 30 31).

## SAGATO

### SAGATO SIAOSI – LE MALETILE

20

Afai o Malia Matalena na fa'amanu'alia i le lē malamalamaina, o Siasi o se tagata o ni mafaufauga tetele. O lo'o i ai mafua'aga e talitonuina ai o ia o se maletile moni na puapua-gatia i Lydda i Palesitina, atonu i taimi luma atu o Kosetatino. O le Ekalesia ua talitonu malosi i le manatuaina o ia, ae lē o talatu'u na si'osi'omia ai lona olaga

Ona sa fa'anaunau e ausia le totogi tele i le mulimuli atu iā Iesu o se talitonuga lenei a le Ekalesia. Ma ua lava lea.

O le tala ile fa'atama'ia e Siasi o le talako, fa'asaoina mai o afafine a le tupu ma fa'aliliuina Libya o se tala Italia mai le seneturi sefulu ma le lua.

O Siasi o se sagato sulufa'i a fitafita fa'asau'u, e pei o fitafita i taimi anamua mai Sasa'e. O ia o se sagato sulufa'i a Enelagi, Siamani, Aragon i Sepania, Genoa ma Venice.



Mikaele Teofilo:



m.teofilo@wn.catholic.org.nz



021 0818 5037



+64 4 496 1707



PO Box 1937, Wellington 6140, New Zealand